

PERSONALITÉ, REALITÉ ET FITNAH

DE

DAJJAAL

PRÉPARÉ ET PUBLIÉ

PAR

ML M SALEEM SEEDAT

56, Rue Arsenal Port Louis

Ile Maurice

Tel: 57326379 - 57576359

Email: msseedat@intnet.mu

INDEX

Introduction	Pg 4
Ahadith concernant Ibn Sayyaad	Pg 7
Hadith de Hazrat Tameem Daari R.A	Pg 13
Position ki banne Sahaba R.A fine prend concernant Ibn Sayyaad après la mort de Rassouloullah S.A.W.....	Pg 16
Incident entre Ibn Sayyaad et Hazrat Aboo Said Khudri R.A.	Pg 17
Ibn Sayyaad considere li même comme Dajjaal.....	Pg 18
Juif considere Ibn Sayyaad comme zotte chef	Pg 19
Comparaison entre description de Dajjaal ki Rassouloullah S.A.W fine donné et Dajjaal ki Hazrat Tameem Daari R.A ti trouvé lor ene l'île	Pg 21
Eski Dajjaal ene dimoune, ene Jinn ou tous les deux ?.....	Pg 23
Concepte de Hulool	Pg 25
Ki sanla fine enchainé Dajjaal	Pg 29
Kifer fine enchainé Dajjaal et ki li fine faire	Pg 31
Similarité dans l'époque de Nabi Suleiman A.S et dans nous l'époque.....	Pg 35

Fitnah de DajjaalPg 39

Technologie et la SciencePg 44

Formule de Kabaala.....Pg 45

Couma zotte fine gagne sa formule la ?Pg 46

Signe et symbole de DajjaalPg 48

Quelque Ahadith concernant fitnah de DajjaalPg 51

40 jours de Dajjaal lor la terrePg 54

Comment pou proteger contre fitnah de Dajjaal.....Pg 56



INTRODUCTION

POU GAGNE ENE MEILLEUR COMPREHENSION DE SA LIVRET LA, LI IMPORTANT KI NOUS LIRE ET COMPREND SA INTRODUCTION LA.

Tous louanges, tous grandeur pou Allah Taala, Createur et Maitre de l'Univers et la paix et Benediction lor Rassouloullah S.A.W, lor so famille et lor banne Sahaba R.A

Topic lor Dajjaal fine toujours être ene topic embrouillant et attire l'attention de majorité banne dimoune, speciallement banne jeunes.

Mo faire ressortir ki explication ki mo pou donner concernant Dajjaal dans sa livret la, c'est recherche et explication ki fine donné par ene Aalim de l'Afrique du Sud. Avec l'aide Allah et par so permission, mo pou essaye explique concernant Dajjaal, so réalité, so fitnah dans ene façon plis simple pou facilite lecture et comprehension de banne ki pou lire sa livret là.

Dajjaal, li derivé du mot Dajal et Dajal veut dire deçavoir, tricher, tromper. En d'autre mot, Dajjaal li ene expert dans deçavoir banne dimounes. Li pou faire ou croire ki sa kitchose la li joli, li bon et ou pou trouve li joli, ou pou trouve li bon mais en réalité, en verité li villain et li pas bon du tout. Tellement li ene expert, li pou couvert sa mauvais kitchose la dans ene tel façon ki quand ou pou gueter, ou pou penser ki sa kitchose la li bon et ou pou accepter li. Sa même ki appelle Dajjaal. Sa même ki Rassouloullah S.A.W fine dire ki Dajjaal pou ena Jannat et Jahannam avec li, so Jannat pou Jahannam et so Jahannam pou Jannat. (Muslim)

Beaucoup dimoune penser ki Dajjaal, c'est ene sujet ki concerne banne dimoune ki pou vivre dans l'époque de Hazrat Mahdi A.S. Donc, si nous pas pou vivre dans sa l'époque là, Dajjaal pas concerne nous. Dans sa façon la, nous ena tendance pou ignore Dajjaal et so Fitnah en croyant ki li pas concerne l'époque ki nous pe vivre actuellement. Mais si nous arriver comprend réalité de Dajjaal, à ce moment là nous pou comprend ki tous seki pe passer dans le monde, tous seki fine passé et tous seki pou arriver dans le future ena ene connection avec Dajjaal. Pou sa raison la même, quand nous analyse dua concernant protection ki Rassouloullah S.A.W ti ena l'habitude demander, nous pou trouver ki li concerne protection pou tout dimoune de tout l'époque. Par exemple : Rassouloullah S.A.W ti ena l'habitude pou demande protection contre Jahannam, ki concerne tout dimoune, protection contre punition de Qabar, ki concerne tout dimoune, protection contre difficulté de la mort, ki concerne tout dimoune, protection contre pêché, contre dette, ki concerne tout dimoune, coumsa même Rassouloullah S.A.W fine tous les temps demande protection contre fitnah de Dajjaal. Sa montré ki fitnah de Dajjaal aussi, li concerne tout dimoune de tout l'époque. D'ailleurs, Rassouloullah S.A.W fine dire ki chaque Nabi A.S depuis Nooh A.S fine informe so peuple concernant Dajjaal. (Muslim) et Li S.A.W fine aussi dire ki plis grand test et fitnah de mo Ummah, c'est test et fitnah de Dajjaal. (Muslim)

D'après beaucoup banne Ulama et banne ki fine faire recherche lor sujet Dajjaal, nous apprane ki sa l'époque ki nous pe vivre la, fitnah de Dajjaal fine déjà fini faire so l'apparition. Mais sa amene nous vers ene question ki peut être beaucoup parmi nous ena dans la tête, c'est ki, si Dajjaal pas encore faire so l'apparition, couma capave ki so fitnah fine fini apparaitre ? Par exemple : Si ene dimoune dire ki sa ban z'enfants c'est z'enfant de ene dimoune ki

pou né 50 ans après. Li pas faire sense. Coumsa même, si Dajjaal pou apparaitre après, couma capave ki so fitnah ki li pou faire fine fini apparaitre, li pas faire sense. Kifer nous appelle sa l'époque là so fitnah, fitnah de Dajjaal ? Nous pous gagne so reponse dans sa livret là Insha Allah.

Ene point bien important pou prend en consideration, c'est tout banne explications concernant Dajjaal ki pou mentionné dans sa livret la, c'est banne explication à la lumiere de Quran, Hadith de Rassouloullah S.A.W, Parole de banne Sahaba R.A etc... Parfois Rassouloullah S.A.W fine servi banne mots et banne expressions ki banne dimounes auparavant (Sahaba R.A etc...) fine comprend dans zotte façon et banne dimounes ki pou vini après, vers la fin du temps aussi pou comprend et zotte pou déduire ki peut être sa Hadith la pe rèfère à sa kitchose ki pe arriver actuellement dans nous l'époque mais deduction ki banne Ulama pou faire, li capave correcte couma li capave pas correcte aussi, parceki li ene deduction humain. Donc, conclusion ki Maulana fine tiré depuis sa banne explication la, li pas Yaqeeni (veut dire li pas prouver sans aucaine doute) mais li Zwanni (veut dire li ene possibilité, cote peut être li correcte couma capave li pas correcte aussi). Mais c'est banne possibilité ki peut être plis proche avec Ahadith de Rassouloullah S.A.W couma nous pou trouver plis devant.

Mo remercier Allah Taala, mo remercier Maulana pou so recherche et mo remercier tout banne ki fine aider pou faire sa livret la vine ene réalité. Mo demande dua ki Allah Taala accepté z'effort de tout banne ki fine participer dans n'importe ki façon et ki li protege nous tous contre le fitnah de Dajjaal. Ameen

Ml Salleem Seedat
Shawwaal 1435 / Aout 2014

AHADITH CONCERNANT IBN SAYYAAD

Meilleur façon pou comprend Dajjaal, c'est nous commence cote Sahabah R.A fine commencé, à ce moment là nous ena l'espoir arrive lor sa conclusion lor lequel Sahabah R.A fine arrivé.

Couma Rassouloullah S.A.W fine être envoyé pou guide l'humanité en entier dans chemin droite, description de so la vie en entier depuis naissance juska la mort fine être mentionné bien avant so naissance, coumsa li vine bien facile pou reconaitre Rassouloullah S.A.W et pou suivre li. Coumsa même Dajjaal fine être envoyé pou devier l'humanité en entier du chemin droite, donc description de so la vie aussi depuis naissance juska la mort fine être mentionné, coumsa Ummah dans chaque l'époque capave reconaitre Dajjaal et protege zotte contre so fitnah.

Description de Rassouloullah S.A.W ki fine mentionné dans banne écriture précèdent, à cause ki banne Juif fine faire changement et fine falsifié beaucoup kitchose depuis dans zotte livre, dans place Rassouloullah S.A.W, c'est personnalité de Dajjaal ki zotte pe attane comme zotte Maseeh, ki pou rétablir pou zotte Royaume de Suleman A.S. Mais description de Dajjaal ki Rassouloullah S.A.W fine informe so Ummah, jamais pas pou ena changement la dans. Donc, pou reconaitre Dajjaal, nous ena juste pou guette description ki Rassouloullah S.A.W fine donné concernant Dajjaal ou ene l'autre façon c'est guetter ki sanla banne Juif pe attane comme zotte Maseeh, Leader, Chef pou contrôle le monde en entier.

Quand nous guette Ahaadith de Rassouloullah S.A.W, verdicte et serment de banne Sahaba R.A concernant Dajjaal, li amene nous vers ene jeune juif ki ti prend naissance dans l'époque de

Rassouloullah S.A.W connu sous le nom de Ibn Sayyaad, Ibn Saïd, Saf. Donc, li pou plis approprié pou commence par li même.

Dans ene Hadith ki trouve dans Tirmizi et Mousnad e Ahmad, rapporté par Hazrat Abou Bakra R.A, li dire ki :

Rassouloullah S.A.W fine dire : Parent de Dajjaal pas pou ena z'enfant pendant 30 ans, après sa zotte pou gagne ene garçon, so ene lizié aveugle, li sans aucune bienfait et rempli avec du tort, quand li dormi, so lizié fermé mais so le cœur reste éveillé, ensuite Rassouloullah S.A.W fine décrire so parent avec nous. So papa pou haute et maigre, so neznez pou ressembler la bec de ene z'oiseaux (longue et pointe) So mama pou bien gros.

Hazrat Abou Bakra R.A continuer li dire, nous fine tendé ki ene z'enfant fine né parmi banne juif de Madina, donc, Hazrat Zubeir Bin Awwaam R.A et mo même fine décidé pou alle verifier sa nouvel la. Quand nous fine arrive dans sa l'endroit la, nous fine trouver ki description ki Rassouloullah S.A.W fine donné correspondre exactement à sa parents Juif la. Nous fine demande zotte concernant zotte z'enfant ki fine prend naissance. Zotte fine repone ki pendant 30 ans nous pas ti ena z'enfant, après sa mo madame fine donne naissance à ene garçon mais malheureusement nous fine trouve li sans aucune bienfait et rempli avec du tort, quand li dormi, so lizié fermé mais so le cœur reste éveillé. Hazrat Abou Bakra R.A et Hazrat Zubeir bin Awwaam R.A fine approche z'enfant la. Zotte fine trouve li allonger dans soleil, envelopper dans ene shawl et li ti pe dire ene kitchose doucement. Quand fine retire shawl depuis lor li, so figure fine decouvert et li fine dire : Ki zotte ti pe dire la ? Etonné, zotte fine demande li : Eski to fine tendé ki nous ti pe causer ? Li fine repone : Oui, car mo lizié fermé quand mo dormi mais mo le cœur reste éveillé. (Tirmizi, Mousnad Ahmad)

Hazrat Umme Salamah R.A fine dire ki Ibn Sayyaad ti né aveugle, circonciré (fini faire Khatnah) et dans ene l'état heureux (li ti pe sourier) (Ref : Ithaful Khayyira)

Quelque Points :

A travers sa 2 Hadith la, nous trouver ki Ibn Sayyaad ti ena 2 kitchose en commun avec Rassouloullah S.A.W. Ene c'est quand li dormi so lizié fermé mais so le cœur reste éveillé et 2eme c'est li ti né circonciré. Banne Ulama fine mentionné ki Ibn Sayyaad pou ressembler Issa A.S et Rassouloullah S.A.W dans plusieurs aspects.

Dans ene Hadith ki trouve dans Bukhari Shareef, rapporté par Hazrat Abdullah Bin Oumar R.A, li dire ki ene fois Hazrat Oumar R.A fine accompagne Rassouloullah S.A.W ensemble avec banne les zotte Sahaba R.A, pou alle verifiair doute ki zotte ti ena envers Ibn Sayyaad. Zotte fine trouve li pe jouer avec banne les zottes z'enfants dans ene jardin de Banu Moughalla.

Dans sa moment la, Ibn Sayyaad ti ene adolescent. Li pas fine apercevoir presence de Rassouloullah S.A.W juska ki Rassouloullah S.A.W fine tappe so le dos avec so la main Mubarak et li S.A.W fine dire : Oh Ibn Sayyaad, eski to temoigner ki mo Allah so messenger ? Ibn Sayyaad fine guette Rassouloullah S.A.W et li fine dire : Mo temoigner ki ou mem messenger de banne Illétre. Ensuite Ibn Sayyaad fine demande Rassouloullah S.A.W : eski ou temoigner ki mo ene envoyé d'Allah ? Rassouloullah S.A.W (dans place li repone negativement) fine dire li : mo croire dans Allah et dans tout seki li fine envoyé.

Ensuite Rassouloullah S.A.W fine demande li : Ki to trouver ? Ibn Sayyaad fine repone : Parfois ene veridique vine vers moi et parfois ene menteur. Rassouloullah S.A.W fine dire : à cause sa

même ki tout le temps to dans confusion. Ensuite Rassouloullah S.A.W fine pense ene verset Quran (Verset 10 de Surah Dukhan)

فارتقب يوم تأتي السماء بدخان مبين

Et li S.A.W fine demande Ibn Sayyaad si li conner ki li S.A.W pe penser dans sa moment la. Ibn Sayyaad fine repone ‘**Dukh**’ (c’était ene portion de verset ki Rassouloullah S.A.W ti pe penser) Lor la, Rassouloullah S.A.W fine dire : ki to deshoner et to reputation gater. Jamais to pou reussi alle plis loin ki to rang.

Hazrat Oumar R.A fine demande Rassouloullah S.A.W permission pou li touye Ibn Sayyaad et fini avec li ene fois pou tout. Mais Rassouloullah S.A.W fine refuser et li fine dire : Si li même sa Dajjaal ki pou apparaitre vers la fin du temps, alors to pas pou capave faire li narien et si pas li sa, alors pena aucaine du bien dans touye li. (Bukhari)

Ene l’autre Hadith dans Bukhari même, rapporté par Hazrat Abdullah ibn Oumar R.A, li dire ki après ene certaine temps, Rassouloullah S.A.W accompagné par Hazrat Ubay bin Kaa’b R.A fine alle visite Ibn Sayyaad encore pou verifier so réalité. Zotte fine trouve li cote banne palmier (pied tamme). Rassouloullah S.A.W fine cachiette derriere ene pied avec l’intention pou écouter ki Ibn Sayyaad pe dire. Li ti couvert avec ene moulton et li ti pe murmure ene kitchose.

Ibn Sayyaad so mama fine trouve Rassouloullah S.A.W derriere tronc de ene palmier. Li fine crié à Ibn Sayyaad : Eh Saf (nom ki so mama ti pe crier li), Mohammad S.A.W la même. Ibn Sayyaad fine assizer de suite. Rassouloullah S.A.W fine dire : si so mama pas ti crier, nous ti pou conne Ibn Sayyaad so secret. (Bukhari)

Ena encore plusieurs rencontre dans sa genre la ki fine ena entre Rassouloullah S.A.W et Ibn Sayyaad ou entre banne Sahaba R.A et Ibn Sayyaad ki plitard fine renforci croyance de banne Sahaba R.A ki Ibn Sayyaad même ki Dajjaal. Beaucoup de sa banne rencontre la ena dans Hadith à travers banne chaine de narration ki solide et authentique et ena beaucoup banne chaine de narration ki faible aussi. Mais banne chaine de narration ki authentique la suffit pou prouve banne points important concernant Ibn Sayyaad. Et nous capave servi banne narration ki faible juste pou gagne impe plis detaile.

Parmi banne narration ki faible, c'est ene Hadith ki trouve dans Mu'jam Awsat, rapporté par Hazrat Aboo Zar Ghifari R.A ki Rassouloullah S.A.W ti envoye li pou rassembler banne informations concernant Ibn Sayyaad juste après so naissance. Li fine demande Ibn Sayyaad so mama concernant Ibn Sayyad so naissance. Parmi banne kitchose ki so mama fine dire, seki li fine reste dans mo ventre pendant 12 mois et quand li ti prend naissance, li ti crier pareille couma ene z'enfant 1 mois crier. (Mu'jam Awsat)

Imam Baghawi fine mentionné dans Sharhus Sunnah, ki Hazrat Jabir ibn Abdullah R.A fine dire ki Ibn Sayyaad ti né aveugle dans ene coté lizié et so le dent ti fini sorti. (Sharhus Sunnah)

Quelque Points :

Dans Hadith ki trouve dans Bukhari pe montrer ki quand Rassouloullah S.A.W ti alle guette Ibn Sayyaad, li ti déjà ene adolescent. Par contre, dans Hadith de Tirmizi, rapporté par Hazrat Abou Bakra R.A, Ibn Sayyaad ti encore ene z'enfant.

Quand nous analyse banne Ahadith concernant naissance de Ibn Sayyaad, nous pou trouver ki li pas ti ene z'enfant normale. Li fine

reste pendant 12 mois dan ventre so mama. Quand li ti né, li ti crier couma ene z'enfant 1 mois so crie. (Mu'jam Awsat) Quand li ti né, li ti déjâ ena le dent. (Sharhus Sunnah) Sa pe montrer ki Ibn Sayyaad pas ti ene z'enfant normale, coumsa même li ti pe grandi bien bien vite.

Ene l'autre point important c'est quand Ibn Sayyaad ti demande Rassouloullah S.A.W si li temoigné ki li ene envoyé d'Allah, Rassouloullah S.A.W pas ti reponne negativement mais li ti donne ene reponse unique. Li S.A.W fine dire : mo croire dans Allah et dans tous seki li fine envoyé.

Mulla Ali Qaari (r) fine expliqué kifer Rassouloullah S.A.W pas fine repone negativement. Li dire ki peut être Ibn Sayyaad fine envi montrer Rassouloullah S.A.W ki pareille couma Allah Taala fine envoie ou S.A.W pou guidance de l'humanité, eski ou S.A.W temoigné ki Allah Taala fine envoie moi (Ibn Sayyaad) pou devier l'humanité ? (si li même Dajjaal) Pou sa raison la peut être Rassouloullah S.A.W fine repone : mo croire dans Allah et dans tous seki li fine envoyé.

Ensuite Ibn Sayyaad fine confirmer ki parfois ene veridique et parfois ene menteur vine vers moi. Banne Ulama fine expliqué à travers declaration de Ibn Sayyaad ki depuis ene l'age très jeune, banne Jinn ti pe frequente Ibn Sayyaad.

Hazrat Oumar R.A fine demande Rassouloullah S.A.W permission pou touye Ibn Sayyaad mais Rassouloullah S.A.W fine dire : Si li même sa Dajjaal ki pou apparaitre vers la fin du temps, alors to pas pou capave faire li narien et si pas li sa, alors pena aucaine du bien dans touye li. Banne Ulama fine dire ki « to pas pou capave faire li narien » veut dire ki Allah Taala fine fini decreté ki Dajjaal pou mort dans la main de Hazrat Issa A.S et si li pas Dajjaal alors pena aucaine du bien dans touye li, veut dire pena aucaine du bien dans touye ene innocent sans aucaine raison.

HADITH DE HAZRAT TAMEEM DAARI R.A

Pendant ki Rassouloullah S.A.W pe continuer so recherche concernant réalité de Ibn Sayyaad, Hazrat Tameem Daari R.A decide pou embrace Islam et sa ti été dans 9eme l'année de Hijri. Li fine mentionne ene incident ki ti arrivé avant li embrasse Islam et Rassouloullah S.A.W fine approuvé.

C'est ene Hadith ki trouve dans Muslim Shareef, rapporté par Hazrat Fatima Bint Qais R.A :-

Li dire ki mo iddat fine fec fini, mo fine tende Muezzin de Rassouloullah S.A.W appelle banne dimounes vers Salaat. Mo fine faire mo Salat derriere Rassouloullah S.A.W en deboutant dans saf de banne madames, ki ti à l'arrière. Quand Salat fine terminé, Rassouloullah S.A.W fine monte lor Mimbar, li S.A.W fine sourié et li S.A.W fine dire à banne Sahaba R.A : Reste dans zotte place, eski zotte coner kifer mo fine reuni zotte ici ? Banne Sahaba R.A fine repone : Allah et so Rassoul cone plis bien.

Rassouloullah S.A.W fine dire : Par Allah, mo pas fine reuni zotte à cause kit nécessité ou kit la peur mais mo fine reuni zotte à cause Hazrat Tameem Daari R.A, ki fine vini pou embrasse Islam. Li fine mentionne ene incident ki fine arrivé ki correspondre à seki mo fine dire zotte concernant Dajjaal. Li (Hazrat Tameem Daari R.A) ensemble avec 30 so compagnons, ti pe voyage par ene bateau, car vague fine prend contrôle de sa bateau la et zotte fine reste divaguer pendant 1 mois. Ensuite, zotte fine rapproche de ene l'île, dans direction cote soleil coucher. Zotte fine monte lor ene ti bateau et zotte fine ramer juska sa l'île la.

Couma zotte fine desanne lor l'île la, zotte fine trouve ene créature bien poilue, couvert avec cheveux, apparaitre devant zotte. Sa créature bien poilue la fine dire : Moi mo « Jassaasah » (espion). Zotte fine demande li, ki li pe rode dire par « espion ». Dans place ki li repone nous question, li fine dire nous pou alle vers ene

tempsle plis devant, cote ena ene dimoune ki pe envi zoine avec zotte et tanne seki zotte ena pou dire. Quand zotte fine tanne li cause concernant ene dimoune dans ene tempsle, zotte fine peur ki peut être c'est ene mauvais Jinn. Quand zotte fine arrive cote tempsle la, zotte fine trouve **ene dimoune bien grand**. So la main ti enchainé juska so li cou et so deux li pied aussi ti enchainé.

Zotte fine demandé : ki sanla to été ? Sa dimoune la fine repone : tres bientôt zotte pou coner ki sanla moi. Li fine demandé : ki sanla zotte été ? Zotte fine repone ki nous banne Arabes et zotte fine expliqué couma zotte fine arrive juska sa l'île là.

Ensuite sa dimoune la fine demandé : Ki zotte coner concernant palmier de Baisaan ? (Baisaan c'est ene l'endroit dans Jordanie) Eski li encore pe recolter datte ? Zotte fine repone affirmativement. Sa dimoune la fine dire : Très bientôt li pou arrete recolter. Ensuite li fine demande concernant lac de Tabriya. Zotte fine repone ki li plein avec de l'eau. Li fine dire : Très bientôt li pou tarir. Ensuite li fine demande concernant fontaine de Zughar. Zotte fine repone ki li plein avec de l'eau et habitant de sa l'endroit la servi sa de l'eau la pou irriguer. Ensuite li fine demande concernant Prophète d'illettré (veut dire Rassouloullah S.A.W) Zotte fine repone ki li S.A.W fine quitte Makkah et li S.A.W fine établi à Yathrib (Madina) Ensuite li fine demandé si banne Arabes fine la guerre avec Rassouloullah S.A.W ? Zotte fine informe li ki Rassouloullah S.A.W fine faire victoire lor bannes Arabes autour de lui et zotte pe obeir li. Sa dimoune la fine dire : Eski sa fine fini arrivé ? Zotte fine reponne affirmativement. Sa dimoune la fine dire : Obeir Rassouloullah S.A.W c'est meilleur kitchose pou zotte.

Ensuite sa dimoune la fine dire ki c'est mo même Dajjaal et très bientôt mo pou être relaché et mo pou sorti ici. Mo pou voyage entier le monde pendant ene periode de 40 nuits, mo pou rentre partout excepté Makkah et Madina. Entrée dans sa 2 places la fine

interdit pou moi. A chaque fois ki mo pou essaye rentre dans sa 2 places la, ene Ange avec so sabre pou empeche moi pou rentrer. Et pou ena beaucoup Anges ki pou surveille tout l'entrée ki amene vers sa 2 places la.

Ensuite Rassouloullah S.A.W fine dire : Incident de Hazrat Tameem Daari R.A correspondre à seki mo ti pe dire zotte (concernant Dajjaal) (Muslim)

Sa Hadith la fine rapporté par le zotte Sahabi aussi comme Hazrat Jaabir R.A avec banne leger différence dans banne mots mais l'histoire la li pareille.

Quelque Points :

Après avoir ki Rassouloullah S.A.W et banne Sahaba R.A fine prend Ibn Sayyad comme Dajjaal (d'après bannes Ahadith ki fine cité avant), Rassouloullah S.A.W ti bizin dire banne Sahaba R.A ki tous seki mo fine dire zotte concernant Ibn Sayyaad ki li même Dajjaal, li pas vrai parceki Hazrat Tameem Daari R.A pe temoigner ki li fine trouve Dajjaal lor ene l'ile. Rassouloullah S.A.W ti bizin dire banne Sahaba R.A ki nous bizin alle demande Ibn Sayyaad maaf parceki nous fine accuse li comme Dajjaal. Mais Rassouloullah S.A.W fine sourier et li fine dire ki incident de Hazrat Tameem Daari R.A correspondre à seki mo fine dire zotte concernant Dajjaal. Si nous analyse les deux Hadith, nous pou trouver ki zotte pas correspondre. Mais Rassouloullah S.A.W fine dire ki Hazrat Tameem Daari R.A so incident correspondre à seki mo fine dire zotte concernant Dajjaal juska présent. Pou nous vine lor ene conclusion, nous bizin conner dans ki sense Rassouloullah S.A.W fine dire ki li correspondre. Correspondre dans ki kitchose ? Si Rassouloullah S.A.W pe rode dire ki Incident de Hazrat Tameem Daari R.A correspondre à « Description de Dajjaal » ki mo fine dire zotte juska présent, nous pou trouver ki « Description de Dajjaal » ki Rassouloullah S.A.W fine donner et

« Description de Dajjaal » dans incident de Hazrat Tameem Daari R.A pas correspondre du tout. (Nous pou explique différence dans description plis devant Insha Allah)

POSITION KI BANNE SAHABA R.A FINE PREND CONCERNANT IBN SAYYAAD APRES LA MORT DE RASSOULOULLAH S.A.W

Après avoir lire Hadith de Hazrat Tameem Daari R.A, nous trouver du moment ki Muezzin fine faire annonce pou vine vers Masjid, et Hazrat Fatima binte Qais R.A pe dire ki li fine faire Namaz dans saf banne madames, derriere saf banne missiés, sa pe montrer ki la plupart banne Sahaba couma Hazrat Oumar R.A, Hazrat Abdullah Bin Oumar R.A, Hazrat Ibn Mas'ood R.A, Hazrat Abou Zar R.A, Hazrat Jaabir R.A etc... zotte ti présent dans sa moment la. Li presque impossible pou dire ki sa banne Sahaba R.A la pas ti présent sa jour la et zotte pas au courant de incident de Hazrat Tameem Daari R.A. Mais nous pou trouver ki sa même banne Sahaba R.A ki ti au courant de l'incident de Hazrat Tameem Daari R.A, zotte ti pe faire serment ki Ibn Sayyaad même Dajjaal.

Hazrat Abdullah Ibn Mas'ood R.A ti pe dire ki mo préfère faire 9 serment ki Ibn Sayyaad , li même Dajjaal dans place ki mo faire ene serment ki li pas Dajjaal (Ithaaful Khayyira, Kitaabul Fitān)

Hazrat Abdullah Ibn Oumar R.A ti pe dire ki mo pena aucaine doute ki Ibn Sayyaad même, sa Dajjaal ki nous pe attane la. (Aboo Dawood)

Hazrat Jaabir Ibn Abdullah R.A ti pe faire serment et ti pe dire : Mo faire serment ki Ibn Sayyaad même Dajjaal. Ene kikene fine

objecté et fine dire « mais li ene Musulman » Li fine repone : même si li ene Musulman, même si li reste dans Madina. (Bukhari)

Hazrat Aboo Bakar R.A fine dire : mo prêt pou faire 10 serment ki Ibn Sayyaad même Dajjaal mais jamais mo pou faire ene serment ki li pas Dajjaal. (Majma uz Zawaaid)

Pou dire ki tous sa banne Sahaba R.A la, pas ti au courant de l'incident de Hazrat Tameem Daari R.A, pas faire sense parceki Hazrat Jaabir Ibn Abdullah R.A, li parmi banne narrateur ki fine raconte l'Incident de Hazrat Tameem Daari R.A dans Aboo Dawood.

Deuxieme point c'est, sa banne Sahaba R.A la, ouvertement fine faire serment mais personne parmi Sahaba R.A pas fine objecté ki Ibn Sayyaad pas capave Dajjaal parceki Hazrat Tameem Daari R.A fine trouve Dajjaal lor ene l'île. Sa pe montrer ki majorité banne Sahaba R.A ti garde zotte l'opinion ki Ibn Sayyaad même Dajjaal.

Incident entre Ibn Sayyad et Hazrat Aboo Said Khudri R.A

Dans ene l'autre incident ki ti arrivé entre Hazrat Aboo Said Khudri R.A et Ibn Sayyad, dans ene voyage de Hajj, montrer ki banne Sahaba R.A ti prend Ibn Sayyaad même comme Dajjaal. Sa incident la trouve dans Muslim Shareef.

Hazrat Aboo Said Khudri R.A rapporté, li dire ki nous ti dans voyage pou Hajj et Ibn Said (Ibn Sayyaad so l'autre nom) ti avec nous. Après avoir ki nous fine pik nous la tente, beaucoup banne Sahaba R.A fine dispersé et ti reste juste moi et Ibn Said. Mo fine senti moi mal à l'aise, car **li ti connu** ki c'est li même (Ibn Said) Dajjaal. Li fine amene so bagage et li fine met zotte cote moi. Li

fine offert moi du lait pou boire mais mo fine refusé, mo fine dire li : trop chaud pou boire du lait. (en verité, mo pas ti content pou boire de so la main) Ibn Said fine comprend et li fine dire : Oh Aboo Said R.A, mo croire mo bizin prend ene la corde et pendi moi avec ene pied lor seki banne dimoune pe causer lor moi. Li fine dire : Oh peuple de Ansaar, eski zotte fine blier Hadith de Rassouloullah S.A.W car zotte même ena plis connaissance concernant Hadith de Rassouloullah S.A.W. Eski Rassouloullah S.A.W pas fine dire ki Dajjaal pas pou ene Musulman et moi mo ene Musulman. Eski Rassouloullah S.A.W pas fine dire ki Dajjaal pas pou ena z'enfant et moi, mo fine quitte mo banne z'enfants dans Madina. Eski Rassouloullah S.A.W pas fine dire ki Dajjaal pas pou capave rentre dans Makkah et Madina et moi, mo reste dans Madina et mo l'intention c'est alle Makkah. (pou faire Hajj) Hazrat Aboo Said Khudri R.A dire, mo ti prêt pou accepter so banne excuse et arguments mais après li fine dire : **Toutefois, mo conne place cot Dajjaal fine prend naissance et cot li été actuellement et si sa travail la ti offert à moi, mo ti pou accepter li.** (Muslim)

Note: Lire sa dernier la ligne la bien et essaye comprend ki Ibn Sayyaad pe rode dire, Insha Allah nous pou expliquer plis devant dans sa livret la.

D'après sa recit la aussi, nous trouver ki banne Sahaba R.A ti prend Ibn Sayyaad même comme Dajjaal.

Ibn Sayyaad considere li même comme Dajjaal

Dans commentaire de Bukhari, Allaama 'Aini (r) fine mentionne ene incident cote pe montrer ki Ibn Sayyaad fine considere li même comme Dajjaal. Sa incident la est comme suite :

Dans l'époque de Hazrat Oumar R.A, l'armée de banne Musulmans ti dans l'Iraq. Zotte ti pe gagne difficulté pou conquerir ene l'endroit ki appelle « Soos ». A ene certaine moment, chef de sa l'endroit la fine monte lor forteresse et fine dire : Oh banne Arabes, nous banne savants fine informe nous ki personne pas pou capave conquerir l'endroit de « Soos » excepté Dajjaal ou l'armée dans ki Dajjaal présent. Si Dajjaal présent parmi zotte, zotte pou capave conquerir sa la ville la.

Quand fine tanne sa annonce la, Ibn Sayyaad fine approche vers la porte de sa forteresse la, li fine donne ene coup pied et li fine crier fort, « Ouvert toi ordure » (li fine servi ene gros mot) La chaine et serrure de sa la porte la fine casser et la porte fine ouvert. Quand banne l'ennemi fine temoigne sa, zotte fine cedé et l'armée de banne Musulman fine rentré et fine conquerir sa la ville la.

Sa incident la fine mentionné aussi par Ibn Kathir, Ibn Aathir et Tabari dans zotte livre concernant la conquete de « Soos ».

Dans sa recit la aussi, nous trouver ki Ibn Sayyaad fine considere li même comme Dajjaal.

Juif considere Ibn Sayyaad comme zotte chef

Dans ene l'autre incident, rapporté par Hafiz Ibn Hajar, dans commentaire de Bukhari, pe montrer ki banne Juif aussi fine prend Ibn Sayyaad même comme zotte chef (comme Dajjaal) ki pou conquerir le monde.

Abou Nu'aim Al Asbahaani fine mentionne sa incident la dans so livre, Akhbaar e Asbahaan, depuis Hassaan Ibn Abdur Rahman, depuis so papa :

Li dire ki après la conquete de Asbahan (ene l'endroit dans Iran), distance entre nous localité et localité de banne Juif ti environ ene farsakh (environ 3 miles). Souvent nous ti pe passe cote zotte. Ene fois, nous fine trouve banne Juif pe dancer et pe tappe tambour. Mo fine demande ene camarade Juif concernant sa fete la. Li fine dire : Nous chef, avec qui nous pou conquerir banne Arabes pe vini demain. Pou conner ki sanla zotte chef été, mo fine demande li permission pou passe ene nuit cote li.

Le matin, mo fine faire fajr dans so la caze même. Après lever du soleil, mo fine trouve ene grand l'armée pe vini. Ti ena ene dimoune au millieu sa l'armée la, couvert par ene la tente pou donne li l'ombrage et banne Juif ti pe dancer et tappe tambour autour de lui. Mo fine guetté de près et mo fine trouve Ibn Sayyaad. Li fine rentre dans sa la ville la et après sa, pas coner si li fine re sorti ou soi non. (veut dire après sa evenement la, pas fine re trouve Ibn Sayyad encore)

Hafiz Ibn Hajar aussi fine mentionné ki Ibn Sayyaad même ki Dajjaal, après avoir mentionne sa recit la.

Tous sa banne recit la et Sahaba R.A zotte serment pe indiquer ki Ibn Sayyaad même ki Dajjaal mais la question c'est couma capave Ibn Sayyad même Dajjaal car Hazrat Tameem Daari R.A fine rencontre Dajjaal lor ene l'ile et Rassouloullah S.A.W fine approuvé.

COMPARAISON ENTRE DESCRIPTION DE DAJJAAL KI RASSOULOULLAH S.A.W FINE DONNÉ ET DAJJAAL KI HAZRAT TAMEEM DAARI R.A TI TROUVE ENCHAINÉ LOR ENE L'ILE

1. Comparaison dans zotte cheveux

Rassouloullah S.A.W fine mentionné ki Dajjaal so cheveux li **bouclé et ondulé** (Bukhari)

Hazrat Tameem Daari R.A fine trouve ene Dajjaal avec longue cheveux. Description ki Hazrat Tameem Daari R.A fine donné concernant Dajjaal ki li fine trouvé rapporté dans Abou Dawood, c'est : Mo fine trouve ene dimoune, enchainé et **li ti pe traîne so cheveux**. (Abou Dawood)

Sa pe montrer ki Dajjaal ki Hazrat Tameem Daari R.A ti trouvé, so cheveux ti bien longue mais Rassouloullah S.A.W fine décrire Dajjaal so cheveux comme bouclé et ondulé (ki veut dire li pas capave longue, li bizin courte et bouclé)

2. Comparaison dans grandeur zotte le corps

Rassouloullah S.A.W fine mentionné ki Dajjaal li ene dimoune **courte** avec large z'épaule (Abou Dawood) avec ene le corps musclé (Bukhari)

Description de Dajjaal ki Hazrat Tameem Daari R.A fine trouvé, rapporté dans Muslim, c'est nous fine trouve ene **très grand dimoune**, ki jamais nous fine trouvé auparavant.

Sa pe montrer ki Dajjaal ki Hazrat Tameem Daari R.A fine trouvé, li ti bien grand, enorme mais Rassouloullah S.A.W fine décrire Dajjaal comme courte et robuste.

D'après banne Ahadith, c'est Ibn Sayyaad ki ti courte et robuste et plis approprié avec description ki Rassouloullah S.A.W fine donné.

3. Comparaison dans zotte l'age

Rassouloullah S.A.W fine mentionné ki Dajjaal, li jeune (Innahou Shaabboun) (Muslim)

Description de Dajjaal ki Hazrat Tameem Daari R.A fine trouvé, rapporté dans Ibn Majah, c'est nous fine trouve ene vieux dimoune enchainé (Shaikhoun) (Ibn Majah)

Dans langue Arabe, le mot Shaikhoun servi soi pou indiquer ene vieux dimoune ou soi servi comme ene titre pou respect. Li très claire ici ki Hazrat Tameem Daari R.A pas pe prendre le mot Shaikhoun comme ene titre pou respect mais li pe rode dire ene vieux dimoune.

Ici aussi, pe montrer ki Dajjaal ki Hazrat Tameem Daari R.A ti trouvé ti ene vieux dimoune mais Rassouloullah S.A.W fine décrire Dajjaal comme ene jeune.

En bref, description ki Rassouloullah S.A.W fine donné concernant Dajjaal et description ki Hazrat Tameem Daari R.A fine donné pas correspondre dans tous aspects. Mais Rassouloullah S.A.W fine dire avec banne Sahaba R.A ki seki Hazrat Tameem Daari R.A fine dire, faire moi plaisir et li correspondre à seki mo ti pe dire zotte juska présent.

Ki Rassouloullah S.A.W pe rode dire par « Li correspondre à seki mo ti pe dire zotte juska présent » car d'après nous analyse, li pas correspondre ? C'est pou sa raison la, beaucoup banne savants fine donne preference Hadith de Ibn Sayyaad lor Hadith de Hazrat Tameem Daari R.A et beaucoup banne savants fine donne preference Hadith de Hazrat Tameem Daari R.A lor Hadith de Ibn Sayyaad, d'après zotte comprehension.

Parceki la facon ki Hazrat Tameem Daari R.A fine mentionne so recit de Dajjaal présent lor ene l'île, pe montrer indirectement ki Ibn Sayyaad li innocent, c'est pas li ki Dajjaal parceki li pas

possible ki Dajjaal, li lor ene l'île enchainé et en même temps Dajjaal (Ibn Sayyaad) li libre, pe marcher dans Madina. (dans l'époque de Rassouloullah S.A.W et l'époque de banne Sahaba R.A) mais à aucaine moment nous pas trouve Rassouloullah S.A.W fine proclame l'innocence de Ibn Sayyaad comme Dajjaal après ki Hazrat Tameem Daari R.A fine raconte so recit ki Dajjaal déjà lor ene l'île. Nous pou trouver ki Hazrat Jaabir R.A fine rapporte l'incident de Hazrat Tameem Daari R.A et en même temps li pe faire serment ki Ibn Sayyaad même Dajjaal (Bukhari)

Pou resourdre sa issue la, ene question ki nous capave poser c'est, eski ena ene possibilité pou unir tous les deux Hadith ? (Hadith de Ibn Sayyaad et Hadith de Hazrat Tameem Daari R.A)

Oui, ena ene possibilité pou unir tous les deux Hadith mais c'est juste ene possibilité , li capave correcte couma li capave pas correcte aussi. Mais quand nous pou lire li et comprend li, nous pou trouver ki c'est le seul possibilité ki capave resourdre sa issue la et à travers sa possibilité la, nous pou capave comprend Dajjaal so réalité, personnalité et so banne fitnah etc...

ESKI DAJJAAL ENE DIMOUNE, ENE JINN OU TOUS LES DEUX ?

Pou dire ki Dajjaal, li ene dimoune, nous pena aucaine probleme avec sa parceki dans plusieurs Ahadith fine mentionne le mot « Rajoul » ki veut dire missié.

Mais Hafiz Nu'aim Bin Hamaad (r) (Ustad de Imam Bukhari r) fine mentionné dans Kitaabul Fitan, l'opinion de quatre senior Tabi'ee, Jubair bin Nufair, Shureih bin Ubaid, Amr bin Aswad et Kathir bin Murrah. Tous les quatre dire ki Dajjaal pas ene dimoune mais li ene **Shaitan**.

Hafiz Ibn Hajar (r) écrire dans Fathul Baari (commentaire de Bukhari) malgré ki sa quatre narrateurs la, zotte authentique mais zotte l'opinion pas pe paraitre trop correcte, li juste ene l'opinion. Mais dans ene l'autre longue narration ki trouve dans Mousnad Ahmad et dans Hakim, ene boutte de sa longue narration la c'est :
..... Ensuite Issa A.S pou dessane (pou touye Dajjaal) ene kikene pou proclamer : Oh banne dimoune, ki kitchose ki pe empeche zotte pou attaque (Dajjaal) sa grand menteur la ? Banne Musulmans pou repone : « **Li ene dimoune ki ene Jinn aussi** »....
(Musnad Ahmad, Hakim)

Dimoune, humain et Jinn, c'est deux different creation. Dimoune, humain fine crée avec la terre et Jinn fine crée avec du feu. Jinn capave voyage ene vitesse incroyable, zotte capave prend forme ki zotte envi, zotte capave pénétrer dans ene substance solide mais ene dimoune, ene humain pena tous sa banne capacité la. Dimoune, humain pas capave trouve Jinn mais Jinn capave trouve dimoune.

Si Dajjaal ene dimoune, li pas capave ene Jinn et si li ene Jinn, li pas capave ene dimoune mais quand pou proclamer ki pe empeche zotte pou attaque Dajjaal, zotte pou repone ki li ene dimoune et Jinn aussi. Sa pe montrer ki Dajjaal, exceptionnellement li ene dimoune aussi et li ene Jinn aussi.

La façon ki Dajjaal pou mort, sa aussi pe montrer ki Dajjaal li pas juste ene dimoune mais li ene Jinn aussi.

Dans Hadith ena ki quand Dajjaal pou trouve Hazrat Issa A.S, avant même ki Hazrat Issa A.S pou capave attaque li, Dajjaal pou fondre pareil couma du sel fondre dans de l'eau. Dans ene l'autre narration ena ki Dajjaal pou fondre pareil couma la cire fondre (Kitaabul Fitan) Dans ene l'autre narration ena ki Dajjaal pou fondre couma du plomb (Ithaaful Khayyirah).

La façon ki pe indiquer couma Dajjaal pou fondre, pe montrer ki Dajjaal, li ene Jinn car ene dimoune , ene humain pas fondre. Pou fondre et pou dissoudre dans l'air, li convenir à la mort de ene Jinn et non pas la mort de ene humain.

Toutefois, quand Hazrat Issa A.S pou retourner après avoir touye Dajjaal, li pou montrer du sang de Dajjaal lors so lance et li pou informe banne Musulmans ki Dajjaal fine fini détruire (Muslim).

Ene Jinn pena du sang, ki capave paraître lor ene lance, sa pe indiquer ki Dajjaal ene dimoune, ene humain.

En bref, la mort de Dajjaal pou englobe la mort de ene Jinn, par fondre et la mort de ene humain, par Hazrat Issa A.S pou pique li avec so lance. Donc, la mort de Dajjaal, li coincide avec seki banne Musulmans pou dire concernant Dajjaal. (Li ene dimoune ki ene Jinn aussi).

Si nous prend possibilité ki Dajjaal li ene combinaison de ene dimoune et Jinn aussi, à ce moment là, nous pou capave reconcilier entre les deux Hadith cote apparemment ena contradiction. Mais la question c'est, couma capave ene dimoune, li ene humain et li ene Jinn en même temps ?

CONCEPTE DE « HULOOL »

Ena ene concepte ki appelle « Hulool ». Hulool veut dire ene l'esprit, ene l'ame rentrer et prend contrôle le corps ene dimoune. C'est ene concepte ki promouvoir dans beaucoup banne religion. Par exemple, banne chretien pretendre ki (Na'ouzoubillah) Dieu fine faire Hulool dans le corps de Jesus, certaine groupe de Shia pretendre ki (Na'ouzoubillah) Allah fine faire Hulool dans le corps de Hazrat Ali R.A, banne Buddhists pretendre ki (Na'ouzoubillah) Dieu fine faire Hulool dans le corps de Buddha. Nous pou trouve concepte de Hulool dans Hinduisme, culture Grec, culture Egyptien etc...

Dans Islam, le concepte de Hulool quand li concerne le createur rentre dans le corps de so creation, sa li connu comme Koufr et Shirk mais le possibilité de ene Jinn rentrer et prend contrôle le corps de ene humain, li connu et possible. Eski li possible ki Dajjaal ene Jinn et li bizin ene le corps pou li circuler ? Eski li possible ki le corps de Ibn Sayyaad fine selecter pou faire sa travaille la ? Eski ena kit indication dans Hadith concernant sa possibilité la ?

Quand nous guette Hadith de Hazrat Aboo Said Khudri R.A ki trouve dans Muslim (**Hadith complet fine mentionné à la page 17**). A la fin de conversation entre Hazrat Aboo Said Khudri R.A et Ibn Sayyaad, après avoir ki Ibn Sayyaad fine présente beaucoup preuve ki li pas Dajjaal, Ibn Sayyaad ti dire : Toutefois, mo conne place cote Dajjaal fine prend naissance et cote li été actuellement et **si sa travaille la ti offert à moi, mo ti pou accepter li.**

Ena 2 possibilité ki Ibn Sayyaad pe faire reference. Premier possibilité c'est, si ti choisir li pou être Dajjaal, li ti pou accepter mais fine choisir ene l'autre dans so place. Deuxieme possibilité c'est, comme Ibn Sayyaad fine admettre ki Dajjaal déjà présent et li coner cote li été actuellement, seule travaille possible ki exister c'est pou présente so le corps comme ene moyen de transport pou transporte Dajjaal ki ene Jinn.

Dans sa contexte la, quand Ibn Sayyaad fine dire ki si sa travaille la ti offert à moi, mo ti pou accepter li, veut dire si servi mo le corps pou transporte Dajjaal, ki ene Jinn, ti offert à moi, mo ti pou accepter li.

Si sa possibilité la correcte, li pou confirme le thèse ki Dajjaal c'est ene Jinn ki pou rentrer et prend contrôle le corps de ene humain. Dans sa façon la, quand Dajjaal pou apparaitre physiquement, li pou apparaitre comme ene humain dans forme et visage de Ibn Sayyaad.

Si sa possibilité la correcte, li pou resoudre tous banne contradictions apparent ki ena entre banne Ahadith concernant Dajjaal. (Hadith de Ibn Sayyaad et Hadith de Hazrat Tameem Daari R.A)

- Description de Dajjaal ki Rassouloullah S.A.W fine donné pou considerer comme description de sa le corps ki Dajjaal pou pénétrer quand li pou apparaitre physiquement dans sa Ummat la et description ki Hazrat Tameem Daari R.A fine donné pou considerer comme description de soi ancien le corps de Dajjaal quand ti capture li et enchaine li lor l'île ou soi description de Dajjaal dans so forme origine en tant ki ene Jinn.
- A travers sa possibilité la, nous capave comprend couma Rassouloullah S.A.W ti explique concernant naissance de Dajjaal ki pou ena dans Madina et Hazrat Tameem Daari R.A so incident pe montrer clairement ki Dajjaal (seki li fine trouver lor l'île) ti déjà vieux, veut dire li lor sa l'île la depuis bien longtemps. Sa pe montrer ki parole de Rassouloullah S.A.W concernant naissance de Dajjaal pe réfere à le corps ki fine selecter pou transporte Dajjaal dans sa Ummah la, le corps de Ibn Sayyaad et parole de Hazrat Tameem Daari R.A pou réfere à le Jinn, Dajjaal li même.
- A travers sa possibilité la, nous capave comprend kifer banne Sahaba R.A fine continuer faire serment ki Ibn Sayyaad même Dajjaal, après avoir tanne incident de Hazrat Tameem Daari R.A. Ici aussi, zotte ti pe réfere à sa le corps ki fine selecté pou transporte Dajjaal, le corps de Ibn Sayyaad.
- A travers sa possibilité la, nous capave comprend kifer Rassouloullah S.A.W fine dire Hazrat Oumar R.A, li pas pou avance narien dans touye Ibn Sayyaad. Donc, parole de

Rassouloullah S.A.W à Hazrat Oumar R.A, si li pas Dajjaal (veut dire si Jinn la pas encore penetrer dans so le corps) to pou juste touye ene innocent et si li même Dajjaal (veut dire si jinn la fine fini penetrer dans so le corps), to pas pou capave touye li parceki to pou touye juste le corps la non pas Jinn la et c'est seulement Hazrat Issa A.S ki pou gagne sa pouvoir pou touye le corps de Dajjaal et Jinn la aussi.

- A travers sa possibilité la, nous capave comprend kifer Rassouloullah S.A.W pas ti pe capave dire avec sureté ki Ibn Sayyaad même Dajjaal (parceki Jinn la dans sa l'époque là pas ti encore penetrer dans so le corps, li ti encore enchainé lor ene l'ile) et en même temps li pas ti denié ki li même Dajjaal (parceki so le corps ti coincide avec description Dajjaal so le corps)
- A travers sa possibilité la, nous capave comprend couma Ibn Sayyaad ti pe reste dans Madina, ena z'enfant, faire Hajj etc... car li impossible pou Dajjaal faire tous sa banne kitchose la. Sa pe montrer ki, avant ki sa Jinn la penetrer dans Ibn Sayyaad so le corps, li ti capave faire tous sa banne actions la (parceki li pas encore vine Dajjaal) mais après avoir ki sa Jinn la pou penetrer dans so le corps, li pas pou ena le capacité pou rentre dans Makkah, Madina, gagne z'enfant etc...
- En bref, si nous capave considerer ki le corps de Ibn Sayyaad fine selecter pou transporte Dajjaal, le Jinn dans sa Ummah la, li pou resourdre tous banne contradictions apparent ki ena dans tous banne Ahadith concernant Dajjaal et li pou ouvert ene nouveau la porte pou comprend réalité de Dajjaal, so fitnah et couma ene kikene capave protége li contre so fitnah. Allah Taala conne plis bien.

Dans sa context la, chapitre de Dajjaal pou divide en deux parties. Premier partie c'est Dajjaal avant ki li libérer et deuxieme partie

c'est Dajjaal après ki li pou liberer. Tous les deux parties important pou nous capave comprend couma Dajjaal ti pe opéré avant et couma li pou opérer après avoir ki li pou liberer.

Premier partie de so la vie, c'est à dire Dajjaal avant ki li liberer, li concerne ki sanla fine enchaine li? Kifer fine enchaine li? Ki li fine faire dans Dunya avant ki fine enchaine li? Dans sa recherche la, nous pou trouve relation entre Dajjaal et Nabi Suleiman A.S, relation entre Dajjaal et Kabaala etc...

Deuxieme partie de so la vie, c'est à dire Dajjaal après ki li pou liberer, li concerne ki z'effort Dajjaal pou faire pou atteindre so but? Ki banne pouvoir ki li pou ena? Couma li pou faire so fitnah dans le monde sans ki li apparaitre physiquement? Ki sanla ki pou suivre li etc...

KI SANLA FINE ENCHAINE DAJJAAL LOR L'ILE?

Dans ene narration ki trouve dans Kitaabul Fitan, rapporté par 6 grand Tabi'ee, Yazid Bin Himyar, Yazid bin Shureih, Jubeir bin Nufeir, Miqdam bin Ma' karib, Amr bin Al Aswad et Kathir bin Murrah (r), zotte dire ki:

Dajjaal, li pas ene humain/dimoune mais li ene Shaitan (mauvais Jinn), enchainé lor ene l'ile avec plis ki 70 joint. Li pas connu si Nabi Suleiman A.S ki fine enchaine li ou soi ene l'autre dimoune. (Kitabul Fitan)

Même ki dans sa narration la, pas fine mentionné clairement si Nabi Suleiman A.S même ki fine enchaine li mais couma zotte fine prend so nom, sa montrer ki nous capave prend Nabi Suleiman A.S comme premier possibilité, ki peut être li même ki fine enchaine Dajjaal lor ene l'ile.

Quand nous analyse Quran et Hadith de Rassouloullah S.A.W, nous pou trouver ki celui ki Allah Taala ti donne le capacité et pouvoir pou capture banne Jinn, c'était Nabi Suleiman A.S.

Dans verset 36 à 38 de Surah Swaad, Allah Taala dire:

Nous fine mette du vent sous so l'ordre et li ti commande li pou avancer doucement vers l'endroit cote li ti oulé aller. Et nous fine faire banne Shaitan aussi (mauvais Jinn) vine sous so l'ordre, parmi ti banne bon constructeurs et banne bon plongeurs. Et les zottes (mauvais Jinn) ti attaché avec la chaine. (Surah Swaad, verset 36 à 38)

Dans Tafseer, pou explique le mot "la chaine", Tabari fine cite depuis Suddi ki dire: la chaine ki relier depuis la main juska li cou. (Tafseer Tabari)

Note: Quand Hazrat Tameem Daari R.A ti décrire Dajjaal lor l'île, li ti dire ki li fine trouve ene grand dimoune **ki so la main ti enchainé juska so li cou** et so deux li pied aussi ti enchainé.

Sa pe montrer ki façon ki Dajjaal ti enchainé lor l'île et façon ki Nabi Suleiman A.S ti pe enchaine banne Jinn, zotte pareil. C'est ene indication ki peut être c'était Nabi Suleiman A.S même ki fine enchaine Dajjaal lor l'île.

D'après ene Hadith ki trouve dans Bukhari, Rassouloullah S.A.W dire ki : Ene mauvais Jinn fine essaye pou gache mo namaz hier soir. Allah Taala fine permettre moi pou capture li. Mo ti ena l'intention pou attache li avec colone masjid, coumsa zotte capave trouve li le matin. Mais quand mo fine pense dua de mo frère, Nabi Suleiman A.S, mo fine laisse li aller. So dua c'était, Oh Allah, pardonne moi et donne moi ene tel royaume ki personne après moi pas pou meriter. (Bukhari)

Dans sa Hadith la, ena indication claire ki pouvoir pou capture banne Jinn et enchainé zotte, ti donné à Nabi Suleiman A.S et à personne d'autre. Donc, sa pe montrer ki fort probablement c'était Nabi Suleiman A.S même ki fine enchainé Dajjaal lor l'île. Allah conne plis bien.

KI FER FINE ENCHAINE DAJJAAL, KI LI FINE FAIRE?

Dans Tafseer Quran, fine mentionné par ene Tabi'ee sous le nom de Ataa bin Abi Rabah, ki avant ki Nabi Suleiman A.S ti faire sa dua la, ti ena ene incident ki ti arrivé, cote Nabi Suleiman A.S ti perdi so Royaume pou ene certaine periode de temps. Quand nous analyse sa incident la, ena banne indication envers ene possibilité ki Dajjaal ti présent dans l'époque de Nabi Suleiman A.S et c'était Nabi Suleiman A.S même ki fine enchainé Dajjaal après avoir réalisé ki c'était Dajjaal même ki fine essaye pou prend contrôle Royaume de Nabi Suleiman A.S.

Dans Tafseer Quran, fine mentionné par beaucoup banne grand savants couma Hazrat Ali R.A, Hazrat Abdullah ibn Abbaas R.A, Hazrat Saeed ibn Musayyib R.A, Hazrat Saeed ibn Jubair R.A, Hazrat Ataa ibn Abi Rabah R.A, Hazrat Mujaahid R.A, Hazrat Qatadah R.A, zotte tous ti reconnu comme banne Imaam de Tafseer, zotte fine dire ki Nabi Suleiman A.S, à ene certaine moment, ti perdi so gouvernance lor so Royaume. C'est pou sa raison la même, quand Allaama ibn kathir explique sa verset cote Allah Taala pe dire: Sans doute nous fine testé Suleiman A.S, Allaama Ibn Kathir dire ki: Allah Taala fine testé Nabi Suleiman A.S concernant so Royaume, li ti perdi so Royaume pou ene certaine periode de temps.

Dans ki façon li fine perdi so Royaume, ena divergence parmi banne savants lor sa sujet la parceki so source c'est banne "Israïli Riwaayat". Israïli Riwaayat c'est banne narrations ki fine

mentionné dans écriture de banne Ahle Kitaab (Juif et Chrétiens). A cause ki banne Juif et Chrétiens fine falsifié et fine faire changement dans zotte écriture, li vine difficile pou trouve ene incident dans zotte écriture ki pena aucaine doute et mensonge. La majorité de banne incidents dans zotte écriture ena doute et beaucoup mensonge.

Mais banne Sahaba R.A fine demande Rassouloullah S.A.W si zotte capave réfère à sa banne écritures la pou gagne plis éclaircissement concernant banne incidents ki fine arrivé dans le passé cote Quran fine cause zotte en bref. Rassouloullah S.A.W fine donne permission mais banne Ulama fine dire ki ena banne condition ki nous bizin prend en consideration.

1. Nous bizin pas croire sa banne narration la avec conviction complete et nous bizin pas rejette zotte complètement aussi.
2. Si banne narration la pe contredire Quran et Hadith, nous bizin rejette zotte.
3. Bizin pas donne sa banne narration la l'importance plis ki Quran et Hadith. Bizin prend zotte juste comme ene reference pou gagne ene éclaircissement à condition ki zotte pas pe contredire Quran et Hadith.....

Parfois Hazrat Oumar R.A ti pe demande Hazrat Kaab bin Ahbar R.A (ki ti ene Juif avant) pou explique concernant seki li fine appranne dans banne écriture de banne Juif et Chrétiens et li ti pe compare zotte avec seki li fine appranne avec Rassouloullah S.A.W et si li trouve kit contradiction, li ti pe rejette zotte.

Ene lot Sahabi ki ti prend beaucoup precaution concernant banne Israïli Riwayat, c'était Hazrat Abdullah Bin Abbaas R.A, Imaam de Tafseer. Quand ti ena ene nécessité, li ti pe considere banne Israïli Riwaayat juste pou éclaircir certaine incident ambigu.

Donc, concernant Nabi Suleiman A.S perdi so Royaume pou ene certaine periode de temps, Hazrat Abdullah Bin Abbaas R.A dire et sa fine mentionné dans Durre Manthur.

Li dire ki ena 4 versets dans Quran ki mo pas ti cone zotte detaile ou explication juska ki mo fine demande Hazrat Kaab Bin Ahbar R.A concernant sa 4 versets la. Ene parmi la dans, c'est le verset 34 de Surah Swaad, cote Allah Taala pe dire : Nous ti place lor so trone ene le corps, ensuite li fine repenti. Hazrat Kaab bin Ahbar R.A fine explique Hazrat Abdullah Bin Abbaas R.A ki ene Shaitan/Jinn ti reussi gagne bague de Nabi Suleiman A.S, dans laquelle ti ena pouvoir de Nabi Suleiman A.S so regne et li fine jette bague la dans l'ocean et ene poisson ti avalle bague la. (Comme conclusion, Nabi Suleiman A.S ti perdi pouvoir lor so trone) Nabi Suleiman A.S ti pe rode so bague et sa poisson la fine être offert à Nabi Suleiman A.S. Quand li fine coupe poisson la, li fine trouve so bague et à travers sa, li fine re gagne pouvoir lor so trone. (Durre Manthur)

Sa incident la fine mentionné par plusieurs savants mais avec banne leger différence. Li pas necessaire ki sa incident la fine arrivé exactement couma fine mentionné mais possibilité ki sa incident la existé, li bien claire.

Quelque banne points ki nous capave tirer depuis sa incident la d'après plusieurs banne differents narration dans **Tafseer Qurtubi**.

1. Pouvoir ki Allah Taala ti donne Nabi Suleiman A.S lor so Royaume, ti trouve dans so bague.
2. Nabi Suleiman A.S so dimoune ki ti plis proche avec li ti appelle Asif (Ref : Nasaai). Li ti ena connaissance de Isme A'zam (Ene nom Allah avec lequel dua accepté)

3. Nabi Suleiman A.S ti ena ene Jinn aussi ki ti bien proche avec li ki ti appelle Sakhar. Li ti ene très mauvais Jinn, ene Shaitan mais avec pouvoir ki Nabi Suleiman A.S ti ena lor banne Jinn, li ti soumettre devant Nabi Suleiman A.S.
4. Le Jinn, Sakhar, fine reussi gagne bague de Nabi Suleiman A.S, à travers ki, Nabi Suleiman A.S fine perdi so control lor banne Jinn etc... Li fine jette bague la dans l'ocean et ene poisson fine avalle bague la. Nabi Suleiman A.S fine sorti pou alle à la recherche de so bague.
5. Pendant l'absence de Nabi Suleiman A.S, le Jinn Sakhar fine prend forme le corps ene dimoune et fine installe li lor trone Nabi Suleiman A.S. D'apres banne Narration, li ti prend forme le corps de Asif. Li ti commence montrer banne dimoune la magie et formule ki Anges Harut et Marut ti montrer banne dimoune de Babylon.
6. Après ki Nabi Suleiman A.S fine trouve so bague dans vente de ene poisson, Nabi Suleiman A.S fine re gagne so pouvoir. Couma le Jinn, Sakhar, fine gagne sa nouvelle la, li fine sauver vers l'ocean et li fine quitte lor trone sa le corps ki li ti servi la, le corps de Asif. (Probablement, sa même ki Allah Taala pe dire dans verset 34 de Surah Swaad : Nous fine place ene le corps lor so trone)
7. Quand Nabi Suleiman A.S fine retourne lor so trone, tout dimoune fine repentir et Nabi Suleiman A.S fine enterre tout bannes livres dans lesquelles fine écrire banne formules de la magie.
8. Nabi Suleiman A.S fine envoye banne Jinns pou capture Sakhar. Nabi Suleiman A.S fine enchaine so la main, li pied et fine emprisonne li dans l'ocean.

Conclusion :

Seki nous capave deduire depuis banne recit ki nous fine lire en haut, c'est, dans l'époque de Nabi Suleiman A.S, ti ena ene incident ti arrivé cote ene Jinn ti essaye prend contrôle trone de Nabi Suleiman A.S. Dans l'absence de Nabi Suleiman A.S, sa Jinn la, ki ti ena connaissance de seki Anges Harut et Marut ti montré banne dimoune dans Babylon. Li fine commence montrer sa connaissance la, ensemble avec la magie à banne Jinn et à banne dimoune dans l'époque de Nabi Suleiman A.S.

Si nous analyse sa Jinn la so l'ambition et seki li fine faire et montrer banne dimoune, nous pou trouver ki li correspondre à Dajjaal, surtout la facon ki Nabi Suleiman A.S fine enchaine li et fine emprisone li dans l'ocean et li pas difficile pou conclure ki peut être c'était Dajjaal même ki ti dans l'époque de Nabi Suleiman A.S. Allah conne plis bien.

SIMILARITÉ DANS L'ÉPOQUE DE NABI SULEIMAN A.S ET DANS NOUS L'ÉPOQUE

Possibilité ki Dajjaal ti libre dans l'époque de Nabi Suleiman A.S et après Nabi Suleiman A.S fine enchaine li et emprisone li lor ene l'île dans l'ocean, sa possibilité la, li renforcé quand nous guette ideologie de banne Zionist et la Francmaçonnerie. C'est sa banne la même ki pe prepare Dajjaal so l'arrivée et ene parmi zotte but c'est pou reconstruire "Tempsle de Salomon" et re amene pouvoir ki Nabi Suleiman A.S ti ena. Banne pouvoir ki Nabi Suleiman A.S ti ena, Allah Taala ti donne sa banne pouvoir la à Nabi Suleiman A.S directement et sa ti considerer comme ene Mou'jizah (miracle divine) et ene signe de Nubuwah à Nabi Suleiman A.S. Mais zordi jour à travers la science et technologie, nous pe trouve même même kitchose pe arriver, saki Nabi Suleiman A.S ti pe faire, à travers pouvoir ki Allah Taala ti donne li, dans so l'époque.

Couma dire ene kikene pe rode imite saki Nabi Suleiman A.S fine faire et pe rode encore une fois régner pareille couma Nabi Suleiman A.S ti pe régner. Mais Allah Taala pas pou laisse zotte atteindre zotte but.

1. Allah Taala ti donne Nabi Suleiman A.S pouvoir lor du vent. Li ti pe ordonne du vent pou amene so trone n'importe cote sa dans ene le temps bien minime.
Zordi jour, pou ene dimoune faire ene voyage de ene pays à ene l'autre pays par avion fine vine ene kitchose normale et même pou alle dans l'espace, li pas ene kitchose extraordinaire de nos jours.
2. Allah Taala ti donne Nabi Suleiman A.S pouvoir lor Jinn. Nabi Suleiman A.S ti pe ordonne Jinn et zotte ti pe construire grand grand batiment avec banne architecture etrange. Dans Surah Sabaa, verset 13, Allah Taala dire: Zotte ti fabrique pou li (pou Nabi Suleiman A.S) seki li ti oulé: banne fortresses, statues, grands bol couma bassin et chaudières bien stables.
Zordi jour, pou arrange banne bel bel batiment, statue etc fine vine ene kitchose banalle et routine.
3. Nabi Suleiman A.S ti pe ordonne certaine Jinn pou plonger dans l'ocean et pou amene banne trèsors de l'ocean, perle etc (Refère à verset 37 du Surah Swaad).
Zordi jour avec technologie de sous marin, scuba diving etc merveille de l'ocean nepli ene mystere.
4. Allah Taala ti pe faire du vent amene la voix de banne dimoune et banne z'animaux depuis bien loin juska z'oreille de Nabi Suleiman A.S. Dans Surah Naml, verset 18, Allah Taala raconte couma Nabi Suleiman A.S ti tanne causer de ene fourmi. Dans Durre Mansour, ena ene

incident cote montrer couma Nabi Suleiman A.S ti tanne ene dimoune dire Subhanallah depuis bien loin.

Zordi jour, avec technologie de telephones, portables, satellite etc la voix et son pe arrive juska z'oreille de tout dimoune dans le monde.

5. Nabi Suleiman A.S ti faire ene Jinn amene trone de la reine Bilqiss (la reine de Sabaa) depuis ene l'autre pays juska cote Nabi Suleiman A.S ti été, dans ene bien ti l'espace de temps ki ene dimoune batte so lizié.

Zordi jour, même ki personne pas encore capave deplace ene item avec sa rapidité la de ene place à ene l'autre place mais à travers fax, internet, portable etc... nous pe capave guette sa kitchose la comme si dirais li devant nous même.

6. Nabi Suleiman A.S ti ena ene z'oiseaux ki ti appelle Houdhoud, li ti pe amene nouvelle à Nabi Suleiman A.S depuis bien loin. Li ti aussi ena la capacité pou detecter cote sa ena de l'eau enbas la terre etc...

Zordi jour, avec technologie de satellite, tous kitchose ki pe passer n'importe cote sa dans le monde, nous fini gagne nouvelle et avec invention de banne machine, ene dimoune facilement capave conner cote sa ena de l'eau enbas la terre.

7. Nabi Suleiman A.S ti pe régner depuis Al Aqsa et so l'autorité rependre dans entier le monde. Pas ti ena ene pays ki ti dans connaissance de Nabi Suleiman A.S excepté ki li ti enbas so l'autorité. Li ti ena ene tel l'armée ki jamais personne pas fine ena. So Royaume ti amene le monde enbas ene seule system de regne. (One World Order)

Zordi jour, sa "One World Order" ki zotte pe rode mette emplace dans le monde, li exactement pareille à seki Nabi Suleiman A.S ti pe faire. Zotte but c'est bizin pena ene seul place lor la terre ki rester et ki pas enbas zotte l'autorité.

Zotte pe depense par million pou ki zotte l'armée vine invincible et en dernier, zotte pe faire tous z'effort pou ki zotte arriver dirige le monde depuis sa place cote Nabi Suleiman A.S ti pe diriger, veut dire Al Aqsa.

Sa c'est quelque similarité entre l'autorité de Nabi Suleiman A.S et système ki pe servi zordi jour pou gagne l'autorité au niveau mondiale excepté ki l'autorité de Nabi Suleiman A.S ti base lor l'unicité d'Allah, attribuer tous pouvoir à Allah et adore ene Allah ki unique mais base de sa système ki zotte pe mette emplace dans le monde la c'est tout à fait le contraire. Li base lor Kufr (Infidélité, rejette Allah), adore Shaitaan et suivre ou desire seulement.

Quand nous analyse sa similarité la, nous capave conclure ki li evident ki ena ene personne ki pe faire tous so z'effort pou li capave prend place cote Nabi Suleiman A.S ti pe assizer, pou li dirige le monde couma Nabi Suleiman A.S ti pe diriger et jouir l'autorité ki Nabi Suleiman A.S ti pe jouir. C'est pas personne d'autre que Dajjaal li même.

Mais quand nous analyse dua ki Nabi Suleiman A.S ti faire avec Allah après avoir complete construction de Masjid e Aqsa: Oh Allah, pardonne moi et donne moi ene tel Royaume qui personne après moi pas pou meriter.

Dans Oumdatul Qaari, Allaama 'Aini (r) mentionné qui ene tel Royaume qui personne après moi pas pou meriter veut dire après moi pas donne personne sa kalité Royaume ki mo fine gagné.

Dans ene hadith de Nasaai, Rassouloullah S.A.W dire ki Allah Taala fine accepté dua de Nabi Suleiman A.S et fine donne li seki li ti envi. (Nasaai)

Donc, d'après dua de Nabi Suleiman A.S, n'importe ki z'effort Dajjaal pou faire, jamais li pou capave re gagne Royaume de

Nabi Suleiman A.S et jamais li pou reussi re rentre dans Masjid e Aqsa pou régner.

FITNAH DE DAJJAAL

Dans hadith, Rassouloullah S.A.W fine dire ki pena aucaine test, fitnah ki plis grand ki fitnah de Dajjaal. (Ibn Majah)

Dans ene l'autre hadith Rassouloullah S.A.W fine dire ki chaque Nabi A.S fine informe so peuple à propos Dajjaal. (Muslim)

Dans ene l'autre hadith, Rassouloullah S.A.W fine montrer so banne Sahaba R.A pou cherche protection avec Allah contre Dajjaal.(Muslim...)

Dans plusieurs Ahadith, Rassouloullah S.A.W fine montrer so Ummat pou lire Surah Kahaf (ou dix verset de Surah Kahaf) pou proteger contre fitnah de Dajjaal. (Muslim.....)

A travers sa banne Ahadith la et à travers plusieurs les zotte Ahadith, nous capave conclure ki même ki Dajjaal pou faire so l'apparition "physiquement" dans l'époque de Hazrat Mahdi mais so fitnah, so test li déjà présent depuis bien longtemps dans sa le monde la, speciallement dans nous l'époque. Même si nous pas pe trouve li physiquement mais z'effort ki li pe faire, li visible devant nous. Nous bizin pas blier ki Dajjaal (le Jinn), li ti toujours présent couma nous fine mentionné avant, ki Hazrat Tameem Daari R.A fine trouve li lor ene l'île et Rassouloullah S.A.W fine approuvé. Le corps ki pou servi pou transporte Dajjaal (le Jinn), sa le corps la aussi Allah Taala fine fini crée dans l'époque de Rassouloullah S.A.W, le corps de Ibn Sayyad. La question c'est quand Dajjaal (le Jinn) pou être

libéré et li pou prend possession le corps de Ibn Sayyaad? C'est ene question ki so reponse trouve uniquement dans connaissance Allah Taala. Mais seki sure, seki n'importe cote sa Dajjaal été actuellement, li pe capave propage so fitnah dans le monde peut être à travers so banne agents (Illuminati, Franç massonerie, Zionist etc...) ou à travers ene l'autre façon mais li pe capave propage so fitnah dans le monde sans ki li montrer li clairement.

Dans sa context la, banne Ulama fine mentionné ki sa hadith cote Rassouloullah S.A.W fine montré so Ummat pou lire Surah Kahaf pou proteger contre fitnah de Dajjaal, sa hadith la pas pe cause concernant juste banne dimounes dans l'époque ki Dajjaal pou apparaitre physiquement mais li pe cause pou tout banne dimounes dans tout l'époque ki pou temoigne fitnah de Dajjaal devant li.

Donc, quand nous analyse banne Ahadith de Rassouloullah S.A.W concernant fitnah ki Dajjaal pou faire, nous pou d'accord ki nous pe déjà temoigne sa banne fitnah la autour de nous.

Pou arrive ene moment cote Dajjaal pou faire so l'apparition physiquement et banne dimounes ki pou vivre dans sa l'époque là, pou trouve Dajjaal en personne devant zotte et sa pou arriver, dans l'époque de Hazrat Mahdi. Mais dans sa l'époque là, Communauté Musulmane pou tigitte mais zotte pou ena pouvoir parceki quand Hazrat Mahdi pou faire so l'apparition, li pou circule dans le monde pendant environ 7 ou 8 ans, banne Musulman pou faire Jihaad ensam avec li, li pou re conquerir banne pays et li pou établir la loi Islamique dans sa banne pays la, Pavillon de l'Islam pou flotter dans chaque l'endroit, l'armée de banne chretiens pou faire defaite et pou détruire et quand pas pou ena personne parmi banne chretiens pou supporte Dajjaal, c'est necque dans sa moment la qui Dajjaal

pou apparaitre physiquement. Tous z'efforts ki li fine faire pendant des années et des années fine alle dans vide, c'est à ce moment là ki Dajjaal pou apparaitre physiquement mais avant sa li pou propage so fitnah dans le monde sans ki li montrer li physiquement dans sa Ummah la.

Fitnah veut dire test, épreuve. Si Dajjaal ti apparaitre physiquement devant nous aujourd'hui, li pas ti pou ene test ou ene épreuve pou banne Musulmans. Tout Musulmans quand ti pou trouve li, ti pou fini coner ki li même Dajjaal. Mais Dajjaal so fitnah pou ene test ou ene épreuve pou chaque Musulman, c'est quand nous pas realise so presence parmi nous et nous pas trouve li, pareille couma ene poisson dans de l'eau jamais li pou morde l'hameçon de sa pecheur la si li cone presence de sa pecheur la, c'est quand li pas realiser ki ena ene pecheur en dehors de l'eau ki pe assizer avec so la ligne, à ce moment là li pou gagne deception et li pou morde l'hameçon.

Coumsa même quand nous pas realize presence de Dajjaal, nous gagne deception, nous trouve kitchose ki villain joli, nous trouve kitchose ki mauvais bon etc... et nous rentre dans so piege.

Si nous analyse banne fitnah ki fine commence après l'époque de Hazrat Oumar R.A, couma le meurtre de Hazrat Ousman R.A, la bataille de Jamal (entre Hazrat Aisha R.A et Hazrat Ali R.A), la bataille de Sifteen, meurtre de Hazrat Ali R.A, meurtre de Hazrat Houssain R.A, revolte de banne Shia, banne Khawaarij, banne Qaadriya, banne Mu'tazila etc... nous pou arrive lor conclusion ki tous sa banne fitnah la fine declenché depuis l'Iraq et li claire ki dans l'Iraq fine tous le temps ena ene la force enorme ki jamais pas fine reussi coner ki sanla ki derriere sa la force enorme la et c'est sa la force la même ki responsable pou tous sa banne fitnah la. (c'est ene l'autre sujet

ki nous pas pou rentre en detaile dans dans sa livret la). Dans nous language nous capave dire ki c'était ene la force invisible et peut être c'était la force de Dajjaal li même. Allah conne plis bien.

Sa thèse la capave prouvé par ene hadith ki trouve dans Mouswannaf bin Abdur Razzaaq:

Quand Hazrat Oumar R.A ti pe prepare ene l'armée poue alle vers direction de l'Iraq, Hazrat Kaab bin Ahbaar R.A, savant renomé de banne écritures précédent, ki fine accepté Islam dans l'époque de banne Sahaba R.A, fine dire Hazrat Oumar R.A ki: Mo penser ki ou bizin pas alle vers sa direction la (veut dire vers l'iraq) parceki sans aucaine doute, Dajjaal demeure dans sa l'endroit la et plis pire de banne Jinns aussi. (Muswannaf bin Abdur Razzaak)

Ene l'autre hadith ki indique vers sa possibilité la c'est le hadith rapporté par Hazrat Abdullah ki trouve dans Ibn Abi Shaiba. Hazrat Abdullah dire ki en verité mo coner ki banne premier la caze ki dajjaal pou taper, c'est zotte la caze, Oh banne habitants de Koufa (Koufa c'est ene l'endroit dans Iraq). Nous faire ressortir ki dans plusieurs banne le zotte Ahadith, Rassouloullah S.A.W fine dire ki Dajjaal pou sorti dans Asbahaan ou Asfahaan. (ene l'endroit dans Iran) (Ref: Tabrani)

D'après ene l'autre narration, Rassouloullah S.A.W fine dire ki Dajjaal pou sorti dans Khurassan (ene l'endroit dans Iran)

D'après ene l'autre hadith, Rassouloullah S.A.W fine dire ki Dajjaal pou sorti entre Iraq et Shaam (Ref: Muslim).

Li bon coner ki dans l'époque de Rassouloullah S.A.W, Iran et Iraq ti considerer comme ene seul l'endroit pareille couma la Syrie, Jordanie, Pallestine etc ti considerer comme Shaam. Donc, dans sa context la, nous dire Iran ou Iraq mais seki sure ki Dajjaal pou sorti depuis sa region la même.

Ene l'autre point ki nous trouver dans different narration, seki Rassouloullah S.A.W fine mentionne different place cote Dajjaal pou sorti (Khurooj e Dajjaal) couma Asfahaan, Khurasaan, Iraq etc... La question c'est couma capave ki ene seul personne (Dajjaal) pou sorti dans different place?

Sa pe montrer ki Khurooj e Dajjaal (quand Dajjaal pou apparaitre) pas pe réfère à Dajjaal en personne parceki ene seul personne pas capave apparaitre dans different place en même temps. Mais ena ene forte possibilité ki Khurooj e Dajjaal pe réfère à so l'impacte ki li pou faire, so fitnah ki li pou propager, dans sa banne region la, à travers so l'armée, so banne agents, ki pou visible à tous dimounes sans ki li apparaitre physiquement juska ki quand l'heure pou arriver, pendant l'époque de Hazrat Mahdi, li pou faire so l'apparition physiquement. C'est pou sa raison la même ki banne Ulama pe dire ki nous pe déjà vivre dans l'époque de Dajjaal, ki veut dire so fitnah ki li pou faire, li déjà autour de nous, Dajjaal so banne agents, so l'armée fine déjà commence propage so fitnah et sa même ene test pou sa Ummah la, couma nous fine expliqué avant, pas quand Dajjaal pou apparaitre physiquement ki sa Ummah la bizin prend compte mais avant ki li apparaitre physiquement même, sa Ummah la bizin prend compte et protége zotte contre so fitnah, lire Surah kahaf tous les vendredi et demande dua protection contre Dajjal avec Allah Taala.

Ene dimoune fine demande Maulana Yusuf Binnori (r) (li ti parmi banne grand Aalim dans Pakistan), Kifer nous appelle fitnah dans nous l'époque fitnah de Dajjaal quand Dajjal pas encore faire so l'apparition? Li ti repone dans sa sense la, li ti dire ki: Banne agents de Dajjaal pe déjà propage fitnah ki Dajjaal pou faire quand li apparaitre, coumsa quand Dajjaal pou apparaitre et quand li pou présente so fitnah devant sa Ummah la, sa Ummah la pou déjà fini habitué avec seki li pou présenter comme fitnah et sa Ummah pou accepter li.

C'est exactement seki pe arriver dans nous l'époque. Tous sa banne fitnah ki nous pe temoigner la, c'est fitnah de Dajjaal même sa. Dajjaal so banne agents et so l'armée pe déjà travaille et propage so fitnah ki nous, Ummah de Rassouloullah S.A.W pe trouve sa normale. Nous pas pe prend seki pe arriver comme ene danger pou nous Imaan et Imaan de nous banne z'enfants (ki ene target directe de Dajjaal). Tellement nous fine habitué avec fitnah de Dajjaal ki autour de nous, nous pe trouve nous compatible avec sa systeme la. Pense ene tigit, si arriver nous vivre dans sa l'époque cote Dajjaal pou faire so l'apparition physiquement ou si nous z'enfant pou temoigne sa l'époque là, couma nous pou capave protége nous contre Dajjaal li même?

TECHNOLOGIE ET LA SCIENCE

Quand nous cause fitnah de Dajjaal, nous ena tendance pense juste banne deviation ki Dajjaal pou faire à travers la musique, declare li comme Prophète et même Dieu etc... mais quand nous analyse fitnah de Dajjal à fond, nous pou trouver ki Technologie et la science aussi ena ene part et zotte forme parti dans fitnah de Dajjaal.

Couma nous ti expliquer dans chapitre de Nabi Suleiman A.S so l'époque. Nous ti dire ki tous banne pouvoir ki Allah Taala ti donne Nabi Suleiman A.S et banne miracles ki li ti pe faire par l'ordre Allah Taala, zordi jour dans nous l'époque, nous pe trouve même kitchose pe realiser à travers technologie et la science. La question c'est couma zotte pe reussi faire tous sa la à travers Technologie et la Science? Ki la force Technologie et la Science ena? Cote sa connaissance la so origine sorti?

FORMULE DE KABAALA

Couma nous ti expliquer dans chapitre “Ki sanla fine enchaine Dajjaal”, ki ti ena ene mauvais Jinn ki ti appelle Sakhar (probablement c'est li même Dajjaal), li ti reussi gagne bague de Nabi Suleiman A.S et li ti jette bague la dans l'ocean. Nabi Suleiman A.S ti sorti pou alle rode so bague. Dans l'absence de Nabi Suleiman A.S, sa mauvais Jinn la, ki ti ena connaissance de seki Anges Harut et Marut ti montré banne dimounes dans Babylon. Li fine installe li lor trone de Nabi Suleiman A.S et li fine commence montrer sa connaissance la, ensemble avec la magie à banne Jinn et banne dimounes dans l'époque de Nabi Suleiman A.S. Quand Nabi Suleiman A.S fine gagne so bague et fine retourne lor so trone, tout banne dimounes fine repenté et Nabi Suleiman A.S fine enterre tout banne écritures lor lesquelles fine écrire banne formules de la magie enbas Masjid e Aqsa. De nos jours, c'est sa banne formules la même ki appelle “Kabaala” dans language de banne francmaçons, Zionist et Illuminati. C'est à travers sa banne formules la même ki zotte pe capave progresser dans Technologie et la Science. En d'autre mot, ena ene grand parti de la magie dans la Technologie et la Science. C'est pou sa raison la même ki beaucoup dimounes fine temoigné ki dans plusieurs banne grand laboratoires dans le monde, ena aussi banne

idoles ki présent ki zotte bizin pou ki zotte capave reussi dans zotte invention. C'est pou sa raison la même, quand nous guette banne invention ki fine faire dans banne siècles précédent, jamais nous pou trouver ki c'est ene Musulman ki fine invente sa kitchose la mais c'est ene Juif ou soi so grand parent ti ene Juif ou ene Satanist. Plis grand preuve dans la science c'est le theorie de Darwin, theorie de l'évolution. Beaucoup banne intellectuelle même dire ki c'est ene theorie ridicule mais le monde entier accepté li et dans tous l'université enseigne theorie de l'évolution. Pareille coumsa, ena beaucoup l'exeremple encore capave donner.

Note: Li bon conner ki Anges Harut et Marut, zotte pas ti montrer banne dimounes de Babylon la magie. Seki zotte ti montrer banne dimounes, c'était ene connaissance, ene formule, ene certaine nom d'Allah ki possede beaucoup pouvoir et ki ena ene l'effet extraordinaire si coner couma pou servi li. Mais c'est banne Jinn ki fine mélange la magie ensemble avec sa banne formules la et fine enseigne sa banne dimounes après.

COUMA ZOTTE FINE GAGNE SA FORMULE LA?

Couma nous fine mentionné ki Nabi Suleiman A.S fine enterre tout banne écritures, banne livres lor lesquelles fine écrire banne formules de la magie. Depuis sa l'époque là, sa banne formules la fine reste enbas Masjid e Aqsa même. Dans l'époque de Rassouloullah S.A.W, banne Juif ti bien fort dans la magie mais à ene niveau bien bas. Seki zotte ti coner concernant la magie, c'est necque ene tigit de sa formule ki banne dimounes ti coner et ki fine transmettre de ene à l'autre et non pas formule ki Nabi Suleiman A.S fine enterré. C'est necque environ quelque siècle après l'époque de Rassouloullah

S.A.W, quand ti ena la croisade, ene groupe de banne “Knights Tempslars”* ti demande le roi de Pallestine de sa l’époque là permission pou faire la priere dans Masjid e Aqsa. Ti arrange ene la chambre pou zotte resté dans Masjid e Aqsa. C’est sa banne “Knights Tempslars” la ki fine commence fouyer en secret et fine deterre ene trésor ki zotte fine envoye dans l’Europe. Quand fine decouvert zotte, fine execute zotte mais trésor ti fini alle vers l’Europe. En verité c’est sa formule ki zotte appelle Kabaala la même ki zotte fine deterré et fine envoye vers l’Europe. Même ki l’Europe fine gagne banne formule de Kabaala, pas ti ena aucaine development. C’est necque après environ 300 ans ki zotte fine reussi decode banne formules de Kabaala et soudain ene pays couma l’Angleterre, la France commence invente banne z’armes, banne machines, banne avions de guerre, train etc... et Technologie fine continuer progresser juska ki seki nous pe trouver autour de nous aujourd’hui. C’est sa ti été le but de la croisade, pou gagne banne formules de Kabaala. Depuis sa, zotte fine faire beaucoup progres dans Technologie et la Science avec l’aide de Kabaala. Beaucoup banne groupe aussi fine formé après sa, couma Illuminati etc... Illuminati veut dire banne celui ki illuminé à travers la lumiere mais zotte lumiere c’est du feu. A l’époque ti appelle zotte “Majoosi”, banne celui ki prier du feu et celui ki prier du feu, c’est banne ki prier Shaitan et dans language de banne francmaçon, Illuminati etc... Shaitan c’est Lucifer. Zotte fine juste change zotte nom mais ideologie la pareille.

C’est pou sa raison la même ki nous pe trouve Dajjaal so signe, so symbol autour de nous tous les jours partout dans le monde.

* Knights Templars c’est ene groupe de banne Chretien ki ti la guerre pou conquerir Masjid e Aqsa. A plusieurs reprise zotte fine essaye conquerir Masjid e Aqsa juska ki Salahuddin

Ayyubi (r) fine combattre zotte et apres sa jamais pas fine re tanne banne Knights Tempslars.

SIGNE ET SYMBOLE DE DAJJAAL

Dans ene hadith ki trouve dans Bukhari, Rassouloullah S.A.W fine dire ki: Pena aucaine Prophète ki pas fine informe so peuple concernant Dajjaal mais mo pou dire zotte ene kitchose ki aucaine Prophète pas fine informe so peuple, Dajjaal ena ene lizié mais Allah Taala pena ene lizié. (Bukhari)

Ici dans sa hadith la, quand Rassouloullah S.A.W fine dire ki Dajjaal ena ene seul lizié, li pas pe réfère à Dajjaal so lizié ki lor so figure parceki Rassouloullah S.A.W fine fini informe nous à travers plusieurs Ahadith ki Dajjaal ena deux lizié. Ene lizié li aveugle et so l'autre lizié ena defaut mais li trouver. Donc seki Rassouloullah S.A.W pe probablement réfère dans sa hadith la ici, c'est Dajjaal so signe, so symbol. Partout cote Dajjaal fine établir so systeme, nous pou trouve ene lizié labas.

Par exemple:

- Quand nous guette lor billet Dollar Americain, nous pou trouve ene lizié.
- Quand nous guette Jeux Olympic, nous pou trouve ene lizié.
- Quand nous guette Hollywood so plusieurs film, nous pou trouve ene lizié.
- Quand nous guette beaucoup banne organization, association cote Dajjaal fine établir so systeme, nous pou trouve ene lizié.
- Quand nous guette dans le monde de la musique, nous pou trouve ene lizié.
- Quand nous guette Cartoon, nous pou trouve ene lizié.

- Quand nous guette Banne Superstar, nous pou trouve ene lizié.
- Quand nous guette dans le monde de sport, nous pou trouve ene lizié.
- Quand nous guette symbole, badge de la police de l'Arabie Saoudite, nous pou trouve ene lizié.
- Quand nous guette beaucoup banne programmes télévisé, nous pou trouve ene lizié etc...



Tous sa la pe montrer nous ki Dajjaal, li présent et li fine fini établir so systeme dans le monde entier. Hollywood inspiré par Dajjaal, seki Hollywood montrer dans beaucoup so banne films,

c'est message ki Dajjaal pe passer concernant banne fitnah ki li pou faire. Tous seki Technologie et la Science ena l'intention pou introduire dans le future, zotte fini montrer sa kitchose la dans banne films de Hollywood. Dans sa façon la, quand nous trouve sa kitchose la dans le future, nous fini habitué avec li et nous accepter li parceki nous fine déjà fini trouve li avant dans films. C'est ene de banne raison kifer tous les temps, banne Ulama fine dire ki Television c'est ene poison pou nous Imaan. Ena beaucoup message de Dajjaal ki passer lor Television et nous accepter li sans ki nous realiser. Si nous prend l'exemple de portable, beaucoup avant ki portable fine vine en existence, nous fine trouve li dans banne films auparavant. Coumsa même, beaucoup avant ki ordinateur vine en existence, nous fine trouve li dans banne films auparavant. Longtemps ti ena ene film cote montrer nous ene l'auto cause avec chauffeur la, li montrer chauffeur la so chemin, li informe li distance etc... li ti paraitre ene kitchose extraordinaire mais zordi jour li fine vine ene kitchose normale. Nous tous coner combien l'auto ena zordi jour ki cause avec nous, montrer nous chemin à travers GPS etc... Donc, seki Hollywood pe montrer nous aster dans so banne films, li capave paraitre exagerer mais dans le future, nous pou trouve sa kitchose la pou vine en existence dans le monde ki nous pe vivre.

Dans sa façon la, nous capave conclure ki Dajjaal pe déjà faire so banne fitnah même ki li pas encore faire so l'apparition en personne. Mais nous en tant que Musulman, nous pe attane ene monstre pou apparaitre et faire desordre partout, faire fitnah partout mais pas coumsa ki Dajjaal pou faire so fitnah.

QUELQUE AHADITH CONCERNANT FITNAH DE DAJJAAL

D'après ene hadith ki trouve dans Muslim, Rassouloullah S.A.W fine dire ki Dajjaal pou ordonne la terre pou tire so banne trèsons caché et banne trèsons pou sorti et pou ensemble avec li (Muslim)

Sa kitchose la aussi, nous pe trouve li partout dans le monde. Tous banne trèsons ki ti caché dans la terre couma petrol, de l'huile, diamant, l'or etc..., à travers Technologie, zotte fine reussi tire zotte et zotte même ki pe controle tous. Si nous analyse couma zotte fine tire sa banne trésor la, nous pou trouver ki jamais ene la force Musulman ki fine tire tout sa banne trésor la, mais c'est banne Juif, banne Zionist ki fine tire zotte. Même banne trésor ki trouve dans banne pays Musulman, couma petrol etc..., c'est banne Juif ki fine tire zotte et zotte même ki pe controle tous.

D'après ene l'autre hadith ki trouve dans Muslim, Rassouloullah S.A.W fine dire ki banne dimounes ki pou croire dans Dajjaal, li pou faire la pluie tomber pou zotte, li pou faire plantation pousser pou zotte, zotte banne z'animaux zotte tetine pou rempli avec du lait et banne dimounes ki pas pou croire dans Dajjaal, pou ena la famine lor zotte et tous zotte z'animaux pou mort (Muslim)

Dans ene l'autre hadith ki trouve dans Musnad Ahmad, Rassouloullah S.A.W fine dire ki tout banne dimounes ki pas pou suivre Dajjaal, zotte pou dans ene grand difficulté. (Ahmad)

Sa kitchose la aussi, nous pe trouve li partout dans le monde. Banne pays ki pas pe accepter et suivre banne termes et

conditions ki imposer par banne Zionists, banne Americain etc... zotte en grand difficulté, ena sanction lor sa banne pays la et zotte pena manger etc... Coumsa même, à travers Technologie, zotte fine fini invente banne l'appareil pou capave change climat, faire la pluie tomber etc... cote zotte envie. (jette ene ti coup d'oeil lor projet HAARP lor internet) Coumsa même, à travers Technologie, zotte ena banne pique ou banne comprimé ki zotte mette dans nourriture de banne z'animaux et à travers sa, banne z'animaux grandi plis vite et donne plis beaucoup du lait etc... Tous sa la c'est pouvoir ki Allah Taala fine donne Dajjaal pou tester banne celui ki ena Imaan et nous pe trouve sa partout dans le monde aujourd'hui.

Dans ene l'autre hadith ki trouve dans Ibn Majah, Rassouloullah S.A.W fine dire ki Dajjaal pou dire avec ene dimoune ki si mo faire to parents re vivre, eski to pou accepter ki mo même Dieu? Li pou faire 2 Shaitan vini dans forme so parents et zotte pou dire li, suivre li, li même to Rabb. (Ibn Majah)

Dans ene l'autre hadith ki trouve dans Mousnad e Ahmad, Rassouloullah S.A.W fine dire ki Allah Taala pou envoie banne Shaitan avec Dajjaal ki pou cause avec banne dimounes. (Ahmad)

Sa kitchose la aussi, nous pe trouve li impe partout dans le monde. Beaucoup banne dimounes ki fine rentre dans la francmaçonnerie, fine temoigné ki fine amene zotte dans ene la chambre pou cause avec zotte parents (ki fine déjà mort). Zotte fine trouve ene dimoune en bleue sorti depuis dans muraille de sa la chambre la (ene dimoune en bleue veut dire ene Jinn) Quand zotte fine guetter, zotte fine trouve zotte papa ki fine dire zotte pou suivre sa banne dimounes la et après sa, zotte papa fine disparaître.

Donc, nous pou trouver ki tous sa banne Ahadith cote Rassouloullah S.A.W fine cause concernant Dajjaal so fitnah, nous pe déjà temoigne tous sa la dans sa le monde ki nous pe vivre la. Sa pe montrer ki nous pe déjà vivre dans l'époque de fitnah de Dajjaal, même ki Dajjaal pas encore faire so l'apparition en personne. Si arriver, nous croire et nous tombe dans piege de sa banne fitnah la, ki veut dire nous fine tombe dans piege de Dajjaal et fitnah de Dajjaal dans l'époque ki nous pe vivre pou continuer augmenter juska ki Allah Taala pou faire Hazrat Mahdi apparaitre. Quand Hazrat Mahdi pou apparaitre, dans entier le monde, banne ki fine soutenir Dajjaal et so l'armée, so banne agents, le monde chretiens, le monde europeen, Nation Unies etc pou declare la guerre contre Hazrat Mahdi. Dans sa moment la, Allah Taala pou faire tout banne Musulman pou forme parti dans l'armée de Hazrat Mahdi. D'après la façon ki nous pe analyser, deux pays pou parmi so l'armée principale, ene c'est Afganistan et deuxieme c'est Shaam (la Syrie, Pallestine etc...). Li clair aujourd'hui ki sa deux place la même ki fine crée plis beaucoup banne Mujaahideen, banne guerriers de l'islam. (Mais l'armée de Dajjaal, banne agents de Dajjaal, Nation Unies, Media etc pou faire le monde croire ki c'est banne Terroristes sa. Coumsa même quand Hazrat Mahdi aussi pou apparaitre, ena ene forte possibilité ki l'armée de Dajjaal, Media etc pou faire le monde croire ki Hazrat Mahdi aussi forme parti de banne Terroristes). Pendant environ 7 ans pou ena la guerre et Hazrat Mahdi so l'armée pou détruire le monde chretien, le monde europeen. Après sa juska Qiyaamat, jamais banne chretiens pou gagne l'occasion pou re vine au pouvoir. C'est dans sa moment la même ki Dajjaal pou faire so l'apparition en personne, physiquement. Li pou apparaitre en personne dans ene moment

cote tous banne ki fine soutenir li pendant des siecles pou fini détruire excepté ene groupe de banne Juif. Dans sa moment la, banne Juif pou joine Dajjaal pou combattre Hazrat Mahdi so l'armée et pou continuer ena la guerre. Capave pou ena beaucoup banne Musulmans ki pou mort mais Musulman pas pou perdi Imaan. C'est l'époque ki nous pe vivre aujourd'hui ki ena danger pou Musulman perdi Imaan à travers fitnah ki Dajjaal pe faire et non pas l'époque ki Dajjaal pou apparaitre en personne. La guerre pou continuer entre Dajjaal so l'armée et l'armée de Hazrat Mahdi juska ki Hazrat Issa A.S pou dessane dans la Syrie et c'est li ki pou touye Dajjaal. Couma nous fine expliquer avant, Dajjaal c'est ene Jinn ki fine prend le corps de ene dimoune pou li circuler dans le monde, donc li pareille couma ene simple dimoune. Mais Hazrat Issa A.S pou touye Dajjaal so Jinn aussi et Dajjaal so le corps aussi. C'est pou sa raison la ki dans hadith ena ki Dajjaal pou fone quand li trouve Hazrat Issa A.S (dans sa façon la Jinn la pou mort) et Hazrat Issa A.S pou touye le corps de Dajjaal aussi avec ene lance (dans sa façon la le corps de Dajjaal pou mort) et fitnah de Dajjaal pou terminer pou tous les temps.

40 JOURS DE DAJJAAL LOR LA TERRE

Rassouloullah S.A.W fine dire ki tous sa fitnah la pou arriver pendant 40 jours couma fine mentionné dans Muslim Shareef. Rassouloullah S.A.W fine dire ki Dajjaal pou reste lor la terre pendant 40 jours, 1 jour pou égalle à 1 an, 1 jour pou égalle à 1 mois, 1 jour pou égalle à 1 semaine et les restes jours pou égalle à bannes jours normale. (Muslim)

Beaucoup savants fine donne beaucoup interpretation concernant sa hadith la et ena beaucoup objection aussi

concernant banne different interpretation ki fine faire. D'après Maulana de l'Afrique du Sud so l'opinion, du moment ki Rassouloullah S.A.W fine informe nous ki tout banne jours pas pou même longueur, li pe paraitre ki banne jours ici veut dire peut être banne different periode de temps, longueur de chaque periode de temps li varier et li trouve uniquement dans connaissance Allah Taala. Periode au commencement pou plis longue et li pou diminuer graduellement juska ki banne les restes periodes pou couma banne jours normale.

Mais seki nous capave trouver ki periode de temps la fine commencé après l'époque de Hazrat Oumar R.A et pendant ene periode de environ 1000 ans, dans lequel nous fine trouve banne fitnah comme la guerre de Jamal, la guerre de Siffeen, Karbala, fitnah de Hitler, premier et deuxieme guerre mondiale, fitnah de Tartar, creation de Rockefeller, Rothschild, Jewish lobby, Francmaçonerie, Illuminati, Zionist etc... Tous sa la c'est banne fitnah ki jamais le monde fine temoigné auparavant et Rassouloullah S.A.W fine dire ki fitnah de Dajjaal pou definitivement plis grand fitnah, test lor sa la terre la mais en dernier c'est banne musulmans ki pou sorti gagnant, à condition ki nous pas mange l'hameçon de sa pêcheur la (Dajjaal).



COMMENT POU PROTEGER CONTRE FITNAH DE DAJJAAL

Pou nous capave protége nous contre fitnah de Dajjaal, nous bizin crée ene connection solide avec createur de Dajjaal, Allah Taala:

1. Nous bizin renforci nous Imaan. Imaan sa même base et fondation de ene dimoune so coté spirituelle. Quand ene dimoune so Imaan li fort, li facile pou sa dimoune la mette banne commandement Allah Taala et so Rassoul en pratique et quand ene dimoune so Imaan li faible, li difficile pou sa dimoune la pratique so Deen et pou reste loin avec peché et fitnah de Dajjaal. Si zordi, communauté Musulmane loin avec Deen, c'est à cause affaiblissement de Imaan. Donc, en premier nous bizin renforci nous Imaan. La façon pou renforci nous Imaan c'est nous bizin cause beaucoup lor Allah Taala so grandeur et donne Daawat beaucoup lor Allah Taala grandeur.
2. Nous bizin suivre sunnah de Rassouloullah S.A.W. Dans suivre sunnah de Rassouloullah S.A.W ena succées dans sa le monde la et dans l'audela aussi. De nos jours, Musulmans fine quitte Sunnah de Rassouloullah S.A.W et fine adopté mode de vie de banne Yahoood et Naswaarah (banne agents de Dajjaal). C'est ene de banne raison kifer Musulmans pe degradingoler dans le monde aujourd'hui. Quand nous pou suivre sunnah de Rassouloullah S.A.W, Allah Taala so l'aide pou avec nous pareille couma Allah Taala so l'aide ti avec banne Sahaba R.A. Couma nous ouler reste loin avec fitnah de Dajjaal car nous pe imite et

adopter mode de vie de banne agents de Dajjaal (Yahood et Naswarah)?

3. Tous les jours demande dua avec Allah Taala pou protégé nous contre fitnah de Dajjaal.

Rassouloullah S.A.W fine montrer nous sa dua la dans hadith:

اللهم انى أعوذبك من فتنة المسيح الدجال

“Allahoumma inni a’ouzoubika min fitnatil maseehid Dajjaal.”

“Oh Allah, mo cherche protection avec toi contre fitnah de Dajjaal le messih”

4. Lire Surah Kahaf tous les vendredi. Ena plusieurs Riwaayat dans Ahadith concernant Surah Kahaf.

- Rassouloullah S.A.W fine dire: Celui ki memorise 10 premier versets de Surah Kahaf, li pou être protégé contre Dajjaal. (Muslim)
- Rassouloullah S.A.W fine dire: Celui ki trouve Dajjaal, li bizin lire Surah Kahaf so banne versets ki trouve au commencement. (Ibn Hibbaan)
- Rassouloullah S.A.W fine dire: Celui ki lire 10 dernier versets de Surah Kahaf, li pou être protégé contre Dajjaal. (Ibn Hibbaan)
- Rassouloullah S.A.W fine dire: Celui ki lire 10 dernier versets de Surah Kahaf, si Dajjaal apparaitre dans so l’époque, li pas pou capave faire li aucaine du tort. (Tabrani)

- Hazrat Aboo Qilaba R.A dire ki: Celui ki memorise 10 versets de Surah Kahaf, li pou être protégé contre Dajjaal. Celui ki lire Surah Kahaf le jour de Jum'ah, li pou être protégé juska Jum'ah prochain. Si li vivre dans l'époque de Dajjaal, Dajjaal pas pou capave faire li aucaine du tort et le jour de Qiyamah, so figure pou eclairer couma pleine lune. (Baihaqi)

Sa c'est quelque banne vertue concernant Surah Kahaf et couma ene dimoune pou être protégé contre fitnah de Dajjaal. Ena hadith fine mentionne 10 premier versets, ena hadith fine mentionne 10 dernier versets et ena hadith fine mentionne Surah Kahaf. N'importe ki façon ki nous adopter, li permettre même ki meilleur c'est ki nous lire Surah Kahaf en entier tous les vendredi.

5. En dernier, c'est ki nous bizin reste loin avec tous banne fitnah et systeme de Dajjaal ki ena dans nous l'époque, couma la Drogue, Pornographie, Immoralité, Cinema, Hollywood, Bollywood, Cartoons, La musique, L'interet, Divertissement, Francmaçonerie, Illuminati, Zionist etc car tous sa la c'est banne z'armes et piege de Daajjaal. Sacrifier sa la vie la pou Allah et nous pou gagne succées dans sa le monde la et dans l'audela aussi.

Note: Nous faire ene rappelle ki beaucoup kitchose ki fine mentionné dans sa livret la, c'est banne probabilité d'après seki pe arriver dans le monde aujourd'hui mais li pas à l'encontre de seki Quran et Hadith pe dire aussi. Allah Taala conne plis bien.

Ki Allah Taala donne nous comprehension et donne nous le tawfeek et la force pou nous reste loin avec fitnah et systeme de Dajjaal. Ameen.



MASONIC EYE ON KFIR PLANE

The **Israel Aircraft Industries Kfir** is an Israeli-built all-weather, multirole combat aircraft based on a modified French Dassault Mirage 5 airframe, with Israeli avionics and an Israeli-built version of the General Electric J79 turbojet engine.



